

焦太史編輯國朝獻徵錄

焦太史編輯國朝獻徵錄卷之三十一目錄

南京戶部一

尚書

師達

古朴

黃福

儲懋

沈翼

張鳳

陳翌

陳俊

黃鎬

潘榮

黃紱

梁璟

鄭紀

熊翀

秦民悅

高銓

張縉

林泮

張泰

雍泰

吳文度

王佐

李瀚

鄧庠

王鴻儒

鄧璋

胡富

蔣昇

王纘

王永裕

邊貢

許誥

周金

徐問

孫應奎

盧紳

鮑道明

曹邦輔

王好問

山陰張汝霖

同校

吳興茅元儀

錢塘徐象標

刊行

目錄

賦役保

賦役保

二

晏山館

焦太史編輯國朝獻徵錄卷之三十一

南京戶部一

尚書

戶部尚書師公達傳

黃佐

師達字九達山東東阿縣人少孤事母孝年十三母疾危殆思食蒸花菜地不常有達亟出求至城南二十五里得之及歸夜已二鼓道遇虎達驚呼天虎舍之去持菜還母食之遂愈由太學生擢監察御史陞陝西按察使時獄囚淹繫殆千人達至審其罪之輕重而決遣之浹旬之間獄爲之空丁母憂去官廬墓

側不如輩飲酒者三年永樂初召爲兵部侍郎尋轉
吏部侍郎 太宗皇帝征北虜命達總督餽運達建
議請均量其程置堡使更遞轉輸則民不困乏而軍
得足食從之 仁宗皇帝嗣位進南京戶部尚書兼
掌吏部事宜德二年正月卒年六十二遣官賜祭命
有司治葬事初達任吏部時典銓衡者率任已自用
不容於人往往不愜輿論達能詢衆以求公當且能
持廉其扈從在北京 太宗皇帝間語左右曰六部
扈從之臣不貪者惟達益 上知之有素云
公年二十餘貢入太學從御史出按遼東方嚴有氣

不阿御史御史劾達達至闕下因服入見狀貌偉
麗面如玉盤戟髯拂拂太祖目而偉之卽以達爲
御史不三月擢陝西按察使至則獄囚繫者數千達
檢案牘訊鞫各以其罪輕重立爲決遣旬月而盡永
樂改元召爲兵部侍郎未幾改佐吏部典選幾二十
年嚴密慎重人莫敢干以私車駕北征沙漠以達
督運達以道里回遠飛芻輓粟疲不能給奏設頓舍
於道令民互相送迎以次轉輸著爲定式營建北都
遣達采木湖湘達以十萬之衆深入窮山賈販不通
軍夫艱食乃爲除關道路檄召商賈往來貿易軍民

樂趣績用有成凡在湖湘八年 仁宗卽位念達舉
露日久召以爲戶部尚書兼掌吏部脩明國賦選拔
人材 朝廷倚重焉宣德二年卒於位賜祭遣官營
葬如法達爲人器宇恢濶議論侃直天性朴儉不殖
生產所得祿賜多分宗黨顯貴四十餘年有子八人
無以贍也 宣宗嘗與輔臣論冠從北來大臣持廉
守正者惟達一人語具 國史

戶部尚書古朴

雷禮

古朴字文質河南開封府陳州人洪武中鄉貢爲太學生奉命清理郡縣田賦圖籍丁父喪歸二十年服闋隸五軍斷事理刑遂奏家貧願仕得祿養母

太祖嘉之除工部營部主事授承仕郎迎母就養京師二十六年母歿官給舟歸葬二十八年服闋改兵部司馬部主事二十九年陞武選司員外郎授奉訓大夫三十年陞郎中授奉議大夫革除三年陞兵部右侍郎授嘉議大夫壬午年成祖正大統改戶部右侍郎轉左侍郎授通議大夫賜文綺襲衣四年因

建北京命採木江西有愛民心竣事特被賜賚七年
上巡狩北京侍 仁宗監國常奉命權禮部兵部及
詹事府事十八年扈行在洪熙元年改通政使是歲
陞戶部尚書授資善大夫賜誥命追賜二代遂謁告
歸省墓賜鈔襲衣朴事親孝非其義一毫不苟取居
官臨事蚤作夜思勤勞弗懈一志於公無敢干以私
者謹守 祖宗成憲不敢踰越或言事久於時小過
不及者亦當損益就中終不爲勅尤惡貪墨戶部主
事劉良素行不檢滿三載特考其績下良叩 上之
左右人求云最考朴曰貪侈之人幸未覺露不改行

終當敗最考不可得也良遂誣奏他事既就逮繫
成祖燭其誣竟釋朴他日吏部奏授良勅命封贈
其父母 仁宗曰豈弟君子福祿攸降是當誣奏大
臣罪者其得爲君子乎不與良卒以耻敗衆服朴之
明所治職務退未嘗語其家人冰蘖之操確乎不移
平素不事生產萃靡雕琢之玩纖毫不留公退清坐
一室書冊自娛常病楊士奇往問之入其齋室几案
間獨有自警編一帙可以觀其所存二十二年以罪
改通政使尋陞戶部尚書蒞事南京洪熙中誥辭有
端厚簡靜操行清潔之褒蓋見知於 上者深矣宣

德三年卒於官

北石
第參
貴之
知一

南京守備叅贊機務少保兼戶部尚書黃福傳
黃福字如錫山東昌邑人自幼風采凝重洪武中以
大學主授項城縣主簿改清源皆有惠政陞金吾前
衛經歷上書論國家大計陞工部右侍郎永樂初遷
左侍郎尋陞工部尚書肇建北京置行部改爲行部
尚書累年民困賴其蘇息交趾叛命將討之福治軍
需調度有方暨平縣其地命以尚書兼掌交趾布按
二司事威惠並行遠人懷服洪熙改元召還京命兼
詹事以輔皇儲其後官交趾者撫治失政致令復
叛再命將出師討之守臣乞命福往福至將已失律

友人得福皆下馬羅拜曰公不北歸我曹豈至此相
與泣下送福出境宣德初改南京戶部尚書上龍
飛初進少保仍兼尚書叅贊南京守備襄城伯李隆
機務隆用其言政肅民安正統五年正月卒年七十
八計開遣官賜祭命有司治葬福歷事五朝多所建
白公正廉恕素孚於人憂國之心始終不渝嘗取范
希文語名其退食之堂曰後樂可以見其志矣初
太宗手疏大臣十人命學士解縉評之縉評諸人皆
有得失惟於福曰秉心易直確乎有守益無少貶也
太宗嘗命福與蹇義等奕福曰臣不能奕曰何爲

不能福曰臣幼時父師嚴惟教臣讀書不令臣奕是以不能福叅贊南京守備時常坐李隆之側大學士楊士奇寄聲曰豈有孤卿而傍坐乎福曰然豈有少保而贊守備乎卒不變然隆待福甚恭公退卽推福上坐福亦不辭士奇南還祭掃先塋至南京福臥病不出士奇卽往見之福驚曰公輔 幼主不可一日離左右何爲遠出至此士奇服其言死之日贈謚不及士論惜之

南京戶部尚書儲懋

南京戶部尚書儲懋字世績直隸鎮江府丹陽縣人
由訓導擢吏科給事中正統改元命經筵講官懋儀
觀魁偉音語明暢講頗稱旨尋陞翰林脩撰與脩
宣宗實錄書成進侍講有白金綵幣之賚遂拜戶部
左侍郎時福建用兵命懋主糧餉得便宜行事懋至
諭有司毋急斂困民因令豪右出粟以助官軍用不
乏景泰元年調禮部右侍郎踰年母卒語起復視事
尋陞南京戶部尚書時已病不能朝尋卒計聞命有
司諭祭治葬

南京戶部尚書沈公翼傳

潘壘

沈公翼字克敬其先自東魯徙居淮安占籍山陽公
生稟穎異日誦千萬言弱冠入郡庠嘗手編三場問
答後學皆宗焉宣德己酉以詩經領鄉薦明年登進
士第正統初擢南京刑部主事改戶部丁母憂起復
仍拜戶部公長於計畫凡所部倉廩之盈虛戶口之
登耗山川之險易賦稅之多寡無不周知時雲南土
官思任發梗化地方弗靖朝廷命靖遠伯王驥率
師討之以公爲轉輸使適連歲荒歉糧餉匱乏公區
處有方供饋弗絕乙丑北虜來庭勅徙置東昌平山

等處撫綏得所丁卯勘問廬州民爭田各得分願又
奏減額外稅五萬餘石人皆悅服己巳陞郎中當廣
寇犯順京師戒嚴芻糧少積 朝廷以公久在戶部
計慮精詳超拜本部右侍郎自慶遭際殫心策畫軍
儲以充尋奉勅協同總兵平江伯陳豫疏築臨清等
虞城隍訓練士卒防遏姦宄仍兼督漕接濟京儲癸
酉陞南京戶部尚書適山東饑民流徙奉勅暫留賑
濟民用敕寧比到官持公道祛宿弊部政一新倉廩
空虛多方儲峙未幾有歸志天順元年勅令致仕抵
家日與宗黨父老賞會燕游不知老之至而力之疲

也尋病卒年六十有六公性鯁介不阿雖有善者稍
不義卽面斥之不善者能改過卽稱許不置故人人
敬憚而悅服焉

資德大夫正治上卿南京戶部尚書張公鳳神

道碑銘

李賢

公諱鳳字子儀先世滄州鹽山人後徙真定之安平
曾祖興祖德林俱潛德弗耀考益故爲禮科給事中
與德林俱用公貴贈資政大夫戶部尚書祖母王氏
母李氏俱贈夫人初李氏有娠一夕夢大星出懷中
覺而生公人以爲異三歲取父書作讀誦狀識者知
有奇志隣有病召巫治之公往觀竟不驗扣其神曰
卿相在此公去神乃降衆驚異曰此子殆不凡者稍
長授春秋穎悟異常已而母卒居喪盡哀人服其孝

永樂己丑北虜犯邊

文廟親征以給事君贊理戎

務因主將失利沒於陣公時年十四大父母垂白在堂家道蕭然公哀毀踰禮奉祖還家竭力事養得其懽心久之有司聞公孝友選爲邑庠生公益奮力於學雖祁寒暑雨不輟遂領鄉薦入太學時鴻臚序班缺員例選北人爲之吏部尚書蹇忠定公義見公異之曰是生不可就此職也宣德丁未登進士第癸丑春擢刑部江西司主事時江西豪民爲逆者千餘人繫獄未決付公理之公一訊皆得其情獄上獲生者數百人能譽大振大司寇嘉公之才特令總閱部章

由主事
特選

奏及錄在京逮繫者正統戊午冬特陞本部右侍郎
由主事進侍郎者自公以前未有也已未夏以京城
草場出納多弊勅公巡督之辛酉春改南京戶部右
侍郎公上疏曰南京根本重地糧不可不素蓄宜每
歲分米二百萬石遂定爲令往年南京芻粟專委之
憲臣至是勅公兼督益以出納嚴慎故也時人以公
執法呼爲張板 朝廷亦知其名已巳春賜璽書嘉
勞有清勤公正之褒賚以白金文綺景泰壬申春陞
本部左侍郎未幾進尚書明年廷議謂公素有譽望
乃轉兵部尚書叅贊守備機務又明年召爲戶部尚

書時邊務方殷錢穀之費動以萬計多以不給爲憂
公至處之裕然國用不勞而足天順改元 皇上復
位思南京舊都得舊人庶可以厭衆心仍命公爲南
京戶部尚書兼督糧儲辛巳春以考績赴闕 上慰
勞有加公以足疾懇辭休致不允舟還疾作而卒年
六十有六公爲人正直而心地平易遇事敢爲人不
敢干以私尤篤友義同門寒於仕途者必極力助之
故人李恂爲太常贊禮郎母老子幼夫婦相繼而卒
公惻然遂養其母以終聘其女爲子婦教養其子至
於成立又急於濟人嘗渡江偶遇一舟覆於急流公

卽捐白金贖人救之舟中之人頗以全活性尤真
客至卽出酒殺對酌爲樂不計豐約與之接者未嘗
不稱爲朴實君子人也歷官幾四十年勤慎如一日
卒之日有司以計聞上深悼之遣官諭祭賜以賻
儀復令有司爲治墳墓給官舟歸葬於鄉

資政大夫南京戶部尚書虹縣陳公翌神道碑

王 俱

公諱翌字仲霄鳳陽虹縣人其先居朱陳村宋季徙
彭城今居虹縣者又徙自國初祖敬先考鑑皆以公
貴累贈資政大夫南京戶部尚書祖妣妣皆夫人公
幼有異質先考尚書公指以語人曰吾家世農業人
知吾所治稼而不知種德吾兒其稼之獲乎宣德壬
子中應天府鄉試正統丙辰會試中進士第授行在
戶部主事歲己巳虜寇犯邊王師北征命往永平等
處備芻糧永平圻內郡征輸繁重民無宿儲公百方

區畫民不厲而兵饒給還奏稱旨復出內帑金數萬兩命糴粟遼陽實邊廩竣事陞郎中尋奉璽書督清江西先是歲賦皆卒伍漕輓時朝廷用武始更以民有司承望風旨嚴程趣辦民殆弗堪公曰賦無後足矣矣以亟爲乃循行郡邑求得其富厚者俾具舟分漕且諭之曰此一時權宜爾師還當無爾勞衆樂從焉景泰初上崇孝敬錄忠義備財用清職罰中舊典體羣臣六事未報聞尚書公計乞歸三司御史交章留之上命公卒事公遽已馳歸喪次聞命復往督漕抵京師而歸服幾終會上命朝廷臣舉堪任方岳者

僉以公討卽其家拜山西右布政使馳傳赴任公聞
民疾苦爲蠲其逋稅至十餘萬石民素利五臺山木
至是有禁公弛之然蘇自若鴈門旣設兵守禦益戍
以民咸釋之使歸農業公旣厚民生謂可以役其力
矣始於其暇日築忻州城除道通平西嶺又感發其
良心俾脩陽曲諸廟學葢民不知勞而頌有德者至
多不容口英廟復辟召還拜都察院右副都御史給
從二品祿巡撫寧夏時西邊連歲用兵民罷敝甚公
拊循之又籍其貧甚者計口給食泰蠲逋租之累里
正者寬兩稅抵輪布帛厥貢果實皮革諸物皆已權

罷之其地故有宜聖廟祀禮與中州等項歲儉止行
釋菜公曰其費幾何而用以化導邊氓其利博矣俎
豆之事吾何敢廢亟復之久之字來入寇邊將失利
虜勢猖獗公檄諸部固城堡繕器械募材武士爲土
兵叅以官兵守要害旣而朝廷命將出師虜始引去
西師解嚴公乃上章乞省墓不允然上亦念公在邊
久思有以少休之矣未幾陞南京戶部左侍郎今
上卽位勅公總督京儲及屯田諸務公始至會臺臣
建議令諸司察舉其屬公首劾罷其不事事者數輩
而薦用其才且賢者廩庾廢壞其脩復之資咸取其

軍役而公有餘材則積以待敝公曰庶有用之物固無告之民吾不能牽於吏議以隱忍於心也卽日以便宜從事人謂公一舉而能除數十年之弊復因災異上卹民力錄囚徒裁省鹽糧俸鈔三事丁繼母憂賜葬祭旋命起復公懇乞終制祥禪召還京陞南京戶部尚書總督如故三年乞奏最上以其兼領諸務止之賜誥命進階資政大夫公至是功業旣成精力向衰在他人若可以少自暇逸而公感知遇期於盡瘁每晨輿入公館治事食頃詣臺迄日旰未休屬僚文移趣辦不少貸卒之以此成疾疾甚猶日省署

不廢嗚呼必如公而後可謂無負於委任矣公爲人
嚴偉立朝稜稜有風望自爲郎署人已憚其剛直無
敢有忤之者及出更藩鎮入踐臺省位叙日高年德
日茂晚生後進以得公接納爲幸而小官下吏趨走
聽令有莫敢仰視者矣公生於永樂甲申壽六十九

南京戶部尚書陳公俊墓碑

彭 韶

公諱俊字時英別號愚菴世居莆之後埭早負才志
穎敏不凡正統丁卯以書舉鄉試第一明年戊辰登
進士第授戶部主事父珪爲廣東文昌縣教諭卒於
官公渡海迎喪海南富土物公私以事至者類輶載
而歸公一無所取上下嗟異服喪家居未嘗干澤郡
縣服闋仍除舊職景泰甲戌差督天津等衛舊欠秋
青草公上言官兵原採取之額已難徵辦况歲增耶
漁不可以竭澤朝議是之得減徵三十五萬束滿歲
歸江南蘇松諸郡負上供銀七十餘萬兩公受委往

督不數月告完部長貳奇其才俾典閩部章奏終其
官天順三年遷員外郎四年春同考禮部會試尋轉
郎中五年兩廣合兵討叛蠻英廟命公往督餽餉
假重權以行公便宜擇吏分方趣辦得無乏是冬遭
母夫人喪乞守制不允次年蠻下兵解始奔喪回監
軍總戎合百金爲贖却之成化紀元復任郎中於其
部未幾陞南京太常寺少卿四年召爲戶部右侍郎
於戶部號素練至是邊事動四方日奏災傷公佐楊
尚書鼎隨時裁穴懸合事宜部屬相謂諸文移稿有
陳公筆如嵌金然其重之如此五年持節充正使冊

封荆王七年京師饑奉 詔平糶太倉米百萬斛以
利民公慮奸黠乘勢射利乃奏請石以下許糴多者
閉不與八年虜聚河套規內侵 憲廟命將征之勅
公總督軍餉於陝西公請出內帑銀助邊且除徑道
發丁飛輓勞動集事無間寒暑是役也榆林大捷公
偕諸將凱還加食從二品俸九年改吏部時退傳尹
公爲冢宰文莊葉公爲左侍郎公與之同德一心前
後銓序最稱得人十三年滿九載拜南京戶部尚書
又越二十二年復滿九載赴 闕請老不允賞齋羊
酒寶鈔俾還任與子天序入冑監公旣還再以老疾

辭遂加太子少保致仕賜璽書馳傳還鄉仍命有司
月給米二石與隸四人弘治元年以疾卒計聞 上
加卹典賜謚康懿

南京戶部尚書黃公鎬傳

黃鎬字叔高侯官人正統十年進士選監察御史十三年奉命按貴州時麓川蠻反詔尚書王驥總兵張軌征之未能定貴道梗鎬躬率精銳轉戰而前會官軍爲賊襲敗驥軍退屯沅派時列城皆被圍而平越尤急議者以平越無積貯欲棄委賊鎬獨不可平越貴咽喉無平越是無貴也乃集城中軍民檄撫苗共守之賊日夜攻圍人乏食至掘鼠羅雀而氣益振會朝廷遣大兵至賊潰方解圍蓋九閱月當是時微鎬貴幾殆景泰三年使還湖湘蠻復反命大臣

戡定鎬叅其軍湖湘平遷廣東僉事改浙江復以爲
廣東左叅政雷廉高三郡負海素多盜鎬皆破滅之
鎬按貴時年甫三十本起諸生及當羣蠻變制勝伐
謀若素閑軍旅者其後屢建戰功由是 朝議以鎬
爲可大用歷長藩臬入爲副都御史又轉二銓館閣
羣公莫不雅敬鎬拜南京戶部尚書以疾乞骸賜璽
書馳傳歸卒於途贈太子少保賜祭葬謚曰襄敏鎬
器局宏遠所在著聲赫赫每遷秩或不足酬功未嘗
自言不汲汲於進人以此重之

南京戶部尚書潘公榮事略

潘榮正統戊辰進士景泰元年拜吏科給事中上疏
開言路抑奔競數事時論甚韙之反克琉球國册封
正使宣布主上德威嗣王以下皆拜舞稱頌嘗記
本國中山八景得用夏變夷之體還擢吏科都給事
中旋遷南京太常寺少卿戶部侍郎改都察院右副
都御史奉勅總督糧儲禁倉庾諸弊省軍士般剝諸
費積羨餘數萬斛以備賑饑疏抑權倖之撓法者減
兩浙償補鹽課其有裨於國計民生甚鉅官至南
京戶部尚書贈太子少保生平端方耿介所至凜然

有冰蘖聲疏三上以致政家十載杜門謝客足不履
公庭布衣蔬食澹泊類窮約人在朝寬弘樂易有古
大臣風度在鄉清修峻雅諸一切塵氛絕無染指鄉
人迄今稱爲長者

南京戶部尚書黃公紱傳

李夢陽

尚書黃公者封丘人也名紱字用章其先洛人高祖克讓始徙封丘克讓生思豫思豫生秀秀生中中生黃公初高皇帝兵起思豫掌太常事以罪編氓沅州已又軍平越衛於是平越沅州封丘洛皆有黃氏乃後秀商金陵死中收其貲商重慶娶於張生公重慶於是重慶亦有黃公生之夜夢老人抱嬰兒曰送塞尚書爲汝子長依舅氏張宗琦宗琦爲麻城學職從如麻城歸如平越補衛學生正統丁卯以春秋中雲南鄉試第五明年登進士第除行人陞南京刑部員

外郎郎中出爲四川叅議叅政進右使轉湖廣左使
陞右副都御史巡撫延綏進南京戶部尚書改左都
御史尚書仍舊黃公廉峻直執遇事颺發正色山立
卽重忤時貴弗恤智巧所避公毅然肩之人率竊笑
其呆然亦以是獲名郎中時人業以硬黃目之矣部
堂嘗缺官公署堂印諸寮事之卽猶堂官也亦才識
超之之故譚千戶者大猾也善懼顯貴人嘗奪民蘆
場顯貴人無敢爲民直者公直之竟歸之民爲叅議
督松茂諸倉兼備其兵蘆革宿弊擒豪惡數百人舉
劾將官各當邊賴以寧叅政如崇慶旋風擁輿不得

行公曰汝冤氣耶姑散予圖之至州齊沐禱夢翌日
清其囚無驗乃禱諸城隍夜果夢若有神言州西寺
云寺去州四十里邊路而巢山公旦起率州官吏兵
往詣寺圍捕之有僧少而惡詰之無牒使醋聖塗其
額曬洗之則有巾痕乃鞠訊之遂盡暴其奸慝云寺
後有巨塘凡投宿人則殺之沉塘奸衆分其財有妻
女則分其妻女又攢典李節陽王親也侵盜官糧巨
萬數王爲之窟公論之悉如法公雖錢穀司然善摘
發奸伏以是威行境中嘗道川東青神吏望風解印
綬走爲右使奏開建昌銀礦許之大盜周王簿者哨

舉鈔掠微公平之公謂盜起於煩苛宜少寬養而聞
官以方貢橫斂公抗不從閭擠移近省陞左使時兩
京工興徵銀例派民公以庫積餘充又勢豪馬
快船債萬坐逼索又荆王奏徙墳塚公悉不從省費
巨萬又計錮僧繼曉於是威惠大行繼曉之來也勢
焰灼人公私謂諸公曰曉以妖術媚上遂奸眠食共
令避而反鄉名掃墓而實逃生耳乃令武昌府錮之
後堂陽尊禮之居無幾曉果敗檻送京斬之西市公
在蜀嘗忤閹臣萬安銜之三年六推咸抑公知之乃
亦連疏乞罷凡三上已乃有巡撫延綏之命劾叅將

郭鏞都指揮鄭印李鐸王琮陵州史知州等又計捕
豪奸張綱乃於是拔才能察幽隱問疾苦飾廢墜於
是申號令脩器械嚴警邏節候望邊政爲新公見飲
馬婦片布遮其下體乃悲以慚曰嗟乎士之貧至此
極乃驅之戰守邪於是令豫支米三月會詔毀庵寺
公使汰尼解軍門給配鰥士人人大懽悅無不願爲
公死者及公去尼有携子女拜送路傍云公旣官六
曹益無所顧避威稜截然特旨改掌憲院天下方仰
望風采公自以歷侍五朝中外凡五十年慙直崖異
忤人獲名伏禍難測又盛滿宜戒乃引年懇乞骸骨

居無何疾作竟不起年七十有一國制文極於六書
尚書官之北平天造不論夏蹇經綸惘惘太宗北征
全國是屬三楊公亮寅協熙績臺省坐臻太平君佚
臣勞所謂代天之相 英廟之遇文達略似馬周吁
俞一德密畫顯斷萬幾積覈局體一變成化間忠良
外植三原河州單縣封丘巍然輩出居則岳屹動則
雷擊大事斧斷小細海畜帷幄佞幸請劔必亟使見
之者畏聞之者懾斯其人死生富貴足動之哉然較
之天順以前則殊矣時與位不同邪委任權力殊耶
弘治中華容洪洞鈞陽靈寶陽曲盧氏金陵安福咸

大業
詩

事
集

稱名卿然志存納約行在精審苟濟其事小枉安
局體又變矣雖形迹罔暴義違矯直亦運數然歟自
言路志伸毀譽進黜氣燄滿盛公卿斂遜正德以來
遂靡靡難觀亦諸人甘寵飾譽稍有嘉美便立祠樹
碑要歌徵頌鏤板鐫石惟恐不流今信後也此意既
橫機巧自生工言論務彌縫斯又一變然黃公爲左
都則嚴甄御史量能委之火其差薄於庭曰事實得
人耳資勞久近豈立官者意哉當是時言官能毀之
黜否耶斯爲政在人邪抑時不同邪公焚奏草自泯
其嘉美視汲汲流今而信後者又何如耶江潮食鹽

錢鈔民苦包攬掊勒呻吟公爲尚書力條其折徵銀
狀以聞至今行之便此其事比之汲汲流今信後者
得與失不較然白哉公年二十六舉進士始室孫郎
中鏞女也生子杞桓封夫人蓋終其身無妾婢云彬爲
撫宣姊生子杞桓封夫人蓋終其身無妾婢云彬爲
工部司務桓光祿司署正公卒之日 皇帝驚悼遣
祭勅有司營葬墓在長葛縣馬陵岡

資政大夫南京戶部尚書致仕梁公璟神道碑

李東陽

公諱璟字廷美世爲太原崞縣人祖諱某從戎朔州
後仍居崞考諱資有行義鄉人稱爲直軒先生贈資
政大夫南京戶部尚書妣史氏贈夫人公性至孝少
時直軒血出於面公以舌舐之而止正統己巳北虜
肆亂直軒從征官兵潰公間變被髮號且走求父所
在值歸乃已嘗爲馬邑縣學生後學革乃入崞學學
成景泰庚午舉山西鄉貢天順甲申登進士第授兵
科給事中成化初累遷都給事中論事持大體壬辰

真諸同官劾大臣不職者因薦致仕尚書王竑都御史高明可用言太激切獲譴幾殆不爲變癸巳擢陝西布政司左叅政偏歷所部詢民疾苦察郡縣吏稱不稱得牧民體分守洮岷適西番縱掠居民驚徙公提兵斬其魁男婦復業者千數以內艱去辛丑服闋復任巡撫都御史而下交薦於朝乙巳進右布政使丁未遷左布政使敷惠勤事視筭尤著在陝前後十五年民熟其名益宜之擢都察院右副都御史巡撫湖廣兼贊軍務公整肅風紀賑饑民理冤獄簡民壯以增武備永州寇作督官兵之鎮守中官毆殺王

親下公勘覆力拒請屬不爲撓以外艱去壬子改四
川有武官鶩不聽令公痛繩以法始皆帖服有剽盜
亦督兵剿之甲寅擢南京吏部右侍郎會獨理部事
事畢舉戊午進戶部尚書出納明審時已嬰疾庚申
遂得請去時足不至公府徜徉山水間日圍碁賦詩
爲樂篤倫收族事兄琮尤謹每宴會拜跪如少時所
賜稟餼月必分給間以散諸族黨歲歉則出粟以周
貧乏死者具棺斂葬之又建石橋書院以教子姓及
鄉之俊秀給薪米筆劄而時課試之續且屬屬其子
曰無廢義學蓋其生平所注意者故至是猶勤勤云

爾以弘治壬戌七月十五日卒距其生宣德庚戌正月十六日壽七十三公敦雅厚重耐清苦遵矩度不事矯飾隨所受任必稱事舉職閱歷既久資望兼積人無訾議而又先幾勇退以壽考終延及子姓方隆而未艾揆諸理數可謂不失其正矣古之語大臣者必先出處其間幸不幸弗論惟所自處合時與義乃可完其名而不辱其身苟終之不合雖有奇節危行卒歸於無用故非仕之難而保終爲難公亦可以無憾哉

南京戶部尚書鄭紀

國史實錄

南京戶部尚書鄭紀字廷綱福建仙遊人天順庚辰進士改翰林庶吉士授檢討憲廟登極獻太平十策尋移疾歸踰二十年再起供職陞浙江副使提督學校弘治二年召爲國子祭酒會萬壽節脩齋醮禮部預取監生供事紀以爲不可上疏諫不聽改南京左通政陞南京太常寺卿南京戶部右侍郎久之進本部尚書致仕正德三年十一月卒年七十賜祭葬如例紀姿貌英特氣象方整爲文章條壘而尤以用世之學自許其爲提學時正樂舞行鄉射毀淫

祠皆有裨風教既調官南京猶數言事 上在東宮
行冠禮紀采自文王以來嘉言善行凡百條各繪圖
作贊名曰聖功圖以進在戶部尤多建明皆關錢穀
大計中間屢被論劾益以其家食既久一旦復出驟
至通顯不免有積薪之議然紀之才略實有過人者
大學士劉健以同年故知之最深故浮言卒不能撼
而 上亦任之不疑也次子主敬亦舉進士爲戶部
主事卒

資政大夫南京戶部尚書熊公狝墓志銘

喻時

公名狝字騰霄號止菴生而曠邁簡肅不知世有術
鬻態而沉醜逸虬莫可以埃雷籠也父仕忠奇焉少
齡業南壇從遊者十人許忽夕覩一絕色女立松樹
上衆皆錯愕走公略不爲意女滅焉遂以刀刮樹皮
大書曰作怪風雷折成形斧鋸分乃明日夜半雷壁
之至今人赫然余先妻祖司馬素菴郝公偶見公諸
生中輒許以廟堂器蓋朗鑒焉公鄉薦後登己丑進
士授武進令濯痼煦寒無毛髮黧染稱循吏擢爲山

西道御史按陝西武臣橫強公發其甚者如指揮王祖輩置之法時酷早久而雨注秦人德之差江西漢夷凶愍不少下借貪吝望風解去而放死刑之寃者爲多邑有毛龍毛虎兄弟稔惡噬染人無數公潛行得實重擬焉還其主賊外而收之官風裁蓋震灼哉劇卷南畿以考最陞山西憲副詔曰天下做官的都照依神可謂受知天子矣分巡冀北道禽白蓮會謀不軌者萬衆公維戮其首妖王良輩而脇從者免陞按察使被欽賞焉是爲憲皇庚戌年也督工張秋陞都察院僉都御史多茂烈又被欽賞無何而陞

副都御史節鎮陝西均徭額興錢法刺奸以存軍民
而紀綱復入邊見寶氣公命掘之得古玉璽一顆文
有受命於天既壽永昌四字納之常上意是年以工
部右侍郎召無釋者不泣下而遮留謂何以還我公
也行間改兵部左侍郎立朝抗顏多建白同右侍郎
顧佐者清薊州草場得體又欽賞焉若籌邊條奏

朝議稱快時大司馬馬文貞公名談然而侍郎有左
熊右熊公爲左熊京輦有兩熊夾一馬天下太平之
議孝廟呼熊鬚子而不名一日奏事鼻帶液上

曰鼻液乃膝寒耳命以宮繡護膝賜之滿期加正二

品服色俸蔭一子入監蓋優給也公年七十擢南戶部尚書一指顧而宿蠹空相傳舊日清尚書熊公爾遇兩宮慶禮成公得特進階資政大夫正治卿上柱國夫人如其例封而父母大父母曾大父母同追秩公七十有二矣丐休詔許馳驛歸公孝友本自營州每得一嘉果必懷焉先嘗父母父母或有所指導神解而受之迨父母見其成而相次亡哭之骨立廬墓側莫薦如生歷忌辰弦晦節必謝客獨寢曰祿養之不及可恨也至生日曰吾母難時也悲乎樂訖其身如此兄三翽翼羣弟一翽同居無異餐茹好酒難近

公待之不言而坐翺改悔焉得俸令各爲治田若屋
若干贍之墓田供奉外推之族嘗謂兄弟曰我五人
身後宜從我祖父父傍爲雁行墓見一脈爾竟埋之
蓋公神遊太素笑言不煩人望見真渾樸無瑕摘而
其中有照不滅焉者脩軀六尺許多毫兩眉彩上射
鼻孔可容指頤有異鬚挺然而入朝接者竦息累官
要樞敦崇同鄉人而不流也家居絕無秘玩築一閣
扁曰尊制示忠也但藏古書千卷別有鳳皇岡之壑
往來觴詠携子共孫徜徉興一觸則舞鶴跳鹿拉王
更者手彈琵琶傲竟夕不知其所如也叟貧死公臨焉

滄溟下呼老友老友聞者感之 武皇復起公而
疾革往矣往之日童孺四與郡學郭生顧生立靈星
門忽聞天鼓響見天門雲光爛開有袍笏一人騰而
上不移晷傳公逝此豈偶然耶 武皇賜御葬四百
五十金計前後誥命十有一勅書四有五欽賞襲衣
白金者三雕花玉帶者一恩遇可謂極數矣但公軍
功該世蔭而大司馬彭澤者將欲請而遂寢於乎功
之不見錄也何但公人臣之分常爾余向聞 今上
皇當陽初夢公稱臣南京戶部尚書熊翀見明日咨
之諸元老稱其風表峻越而臨穎賈公以先大臣第

一流對 今上皇異焉諭以祭公其歿而聲靈通帝
座者也視之蔭異重輕哉公奏疏與詩文若干卷今
但有止菴集行世

南京戶部尚書秦民悅

秦民悅字崇化廬州府舒城縣人天順丁丑進士授
行人遷工部屯田員外郎賑濟京畿諸縣多所全活
成化壬辰遷廣平府知府考政爲郡守第一如檢勘
荒田馬地共三千餘頃辯冤活獄一十九人招流納
徙六千戶皆燁燁在人耳目九載去任立祠豎碑
以思之甲辰遷江西布政司右叅政弘治改元擢本
司右布政使按部戢奸吏抑豪強均賦平役民賴以
安辛亥擢都察院右副都御史整飭薊州等處邊備
兼巡撫順天等府奏乞減莊田租課以紓民困增密

遷戶部右侍郎改吏部右侍郎明年以父喪去任服闋添註都察院右副都御史未幾仍改吏部右侍郎已未拜南京吏部尚書庚申改南京兵部癸亥丁繼母憂乙丑服闋改南京戶部正德丁卯致仕至七年三月卒年七十九計聞賜祭葬如例謚曰莊簡民悅沉靜謹恪進止有常平居卷不釋手操觚染翰老而不倦在繼母憂中嘗疏老疾乞休詔答以勉終禮制尚俟起用言官乃有論其急於進用者然民悅蒞官持已不失法度士論多歸之

資善大夫南京戶部尚書致仕贈太子少保高

公銓墓表

李東陽

公姓高氏諱銓字宗選世傳爲媽州人國初徙揚之江都祖友直父亨皆用公貴贈通議大夫都察院右副都御史公生方亂日誦數百言十三能爲韻語夫順丁丑補縣學生吏部王端毅公時知府事置資政書院教諸生俊秀者公與焉成化乙酉舉鄉貢己丑登進士第武諷使增年以備臺諫公曰某不敢爲也授大理寺右評事上疏言時政六事丙申錄囚福建平反至百餘人及會勘大獄不爲私撓擢山東按察

司食事改浙江河南歲饑人相食朝廷遣侍郎一人往賑公實授分任驗丁口程遠近審緩急務均實惠屬吏爲侵尅雖有所憑附亦按治之流移四集者蒸染爲疫厲公請給衣糧亟散遣之其所全活多至不可數歸德有黃河退地千餘頃爲親藩所據州守亦以租負被訟於朝命中官及侍郎都御史按其事公謂租負責之州地則民所恃爲業者中官挾以禍福執不變後他藩亦以河退地請其官長欲私於長史以其半兩釋之公不可民賴以不病凡一官歷二臬九載四薦乃遷浙江副使卽攝司事清案牘勤聽

功
女
秋
正

斷羣吏斂手勾考戎籍姦惡無所伏壬子擢河南按察使河決張秋命官浚治公以贊畫勞賜白金文綺乙卯歷遷左布政使丙辰擢都察院右副都御史巡撫保定諸府兼督燕門諸關定徭役修要害有妄指民田獻爲皇莊者命侍郎二人會勘民冤聲撼野至陝州縣吏不得行衆頗縱之欲藉以塞命公曰若是則民重得罪請勘實以聞主上仁明當不忍奪民利以徇左右已而果然庚申陞南京工部右侍郎累攝吏戶兵三部事癸亥江淮饑復領賑濟所活亦衆陳荒政八事多行之進南京右都御史掌院事正

德丙寅 今天子擢爲南京戶部尚書令衛士康
與折銀每月兼給人甚便之丁卯南京吏部及北院
相繼告闕公兩被名薦會逆瑾竊柄不悅於公特令
致仕猶銜之不置逮就詔獄文致無所得乃放歸後
竟撫他事概其官庚午詔復以本官致仕中外方集
其再用而公卒矣公慮事周悉通貫條格每自謂治
律之功不減治經經史外若陰陽祿命堪輿醫藥之
類罔不涉獵始號平山晚更號遺安老人所著有平
山遺安二稿若干卷後以例請於朝特贈太子少
保賜葬祭

戶部尚書張縉

雷禮

張縉字朝用其先順天寶坻縣人曾祖諱仲和勝國
時爲山西太原路總管因家陽曲縉幼穎悟不凡既
冠領天順丙午鄉薦以成化己丑登中科初知鈞州
鈞民多頑犷以嚴治之素弗友者皆斂手奉令尋以
內艱歸終喪改知滄州居南北之衝且頴病雨淹多
方賑救民賴之安權貴欲請境內地爲莊田縉不可
其事乃寢陞南京工部郎中剷除宿弊羣臣故囊橐
爲奸利者無所容未二年陞杭州知府蓋重其地而
屬之也縉以廉政自特守臣臺使以及監司無弗敬

信者在郡八年節縮百費省民財十有餘萬陞山東
參政去之日杭人留其履以識不忘弘治癸丑河決
張秋上命平江伯陳銳都御史劉大夏治之百需
悉委調度甲寅功成遂陞其秩爲通政司右通政屬
之行河時衝決之餘溝防不治緝相其緩急以漸修
濬無所遺又於決口之東甃石岸數里以圖勿壞又
新築南旺東堤樹柳其上每歲夏秋水溢挽卒得分
行無阻至今便之庚申八月陞都察院右僉都御史
巡撫保定等府飭士馬以防寇掠有發輒得畿內寇
幾絕嘗疏陳八事皆切民病辛酉四月陞右副都御

史巡撫宣府虜入遮擊屢有新獲之功是歲十一月
改督漕運造舟之價必預給漕卒必選其精壯者補
之癸亥甲子淮楊連歲告飢奏留糧米若干萬石所
全活者甚衆丙寅陞戶部左侍郎時逆瑾專政惡其
不已附者會南京戶部尚書缺以縉往補而卽因事
逮之時同逮皆復官惟縉致仕過滄滄人留止之乃
家於滄然瑾銜縉未釋也復尚書韓文同下詔獄罰
輸邊米五百石又坐前揚州災嘗改揚之兌運二萬
五千石於鳳陽上納瑾以爲更制除其名辛未劉齊
二賊掠畿甸滄被圍七日城中士民欲許賊和以緩

竊來卽縉謀曰許之和是降城矣降於法何如吾家三十口誓不能降賊而生也衆義之相嬰城固守勇百倍於初賊勢挫其圍遂解未幾復召爲右都御史仍督漕運兼淮南勦賊事至則選鋒追勦又設伏以遏其衝賊圍邳縉素知東海千戶張瀛者以謀勇稱遂令率健士開南柵迎敵有三騎突來蓋賊魁也皆中矢斃其黨遁去城乃完七月賊捨騎入江縉於儀真於瓜州皆嚴兵以待旣而賊勢日蹙乃有狼山之捷上勞以璽書金帛時境內累經兵燹民物凋瘵又加意撫綏漸有生意然縉亦老已倦於勤矣凡七

疏乞休不允甲戌以入議至滄不進復疏乃許之仍
復南京戶部尚書致仕命有司給歲夫月廩凡居滄
有一年而終年八十有三緡器宇魁岸風神秀朗持
已蒞下嚴重有威理勞處劇綽有餘裕故起州郡歷
方岳陟臺省所至輒著能聲樹成績居家孝友交接
以誠好賢喜士多所崇獎生平嗜學手不釋卷星曆
醫卜皆臻其妙性好吟咏有玉雪遺藁若干卷其所
建白又有奏議若干卷藏於家

南京戶部尚書成齋林公泮墓志銘

舒芬

大司徒成齋林公以成化壬辰進士授南京大理寺評事歷陞寺副寺正盡心庶獄嘗有吳鑑者宜津人以與強賊同姓名逮繫又有王子流者江西人亦捕爲強賊爲刑迫皆自誣服公駁之踰時果獲真盜陞廣州府知府府治省城吏奸政弊訟繁公處之若無事例有堂食公一不指染嘗過厓山門有石刻元丞相伯顏滅宋於此公改刻宋太傅樞密使張世堯死節於此凡郡之忠義貞節多所表異郡有藍溪諸山

文淵
卷之二十一

卷之二十一

卷之二十一

卷之二十一

卷之二十一

洞蠻時方猖獗公承檄以兵入其穴擒所渠帥因圖
地形會總兵盡屠之又豐湖保十三村民皆爲盜拒
敵公至其地諭降之戊午陞廣西叅政奉勅總督糧
儲兼理屯田時逋欠三十三萬公偵知湖米方賤下
令減直收銀差官往湖糴米民甚便之輸不後時既
半年逋欠畢集辛酉陞江西右布政使轉左布政使
廉公有威吏弊一熄嘗以陳先生濬所著禮記集說
文廟編性理大全書旣取爲大註是陳有功於禮奏
乞從祀孔廟不果乙丑登順天府尹省寺供億悉復
舊章威聲豪右幾輔以治正德丁卯陞戶部右侍郎

總督太倉糧儲時逆瑾方用事公惟內無所失而處之甚恭會奉勅往鳳陽河南會勘徽府田土事竣加俸一級戊辰陞南京戶部尚書投資政大夫時逆瑾益撫大臣多從中罷免甚者中以法公亦惴惴有去志方啓行出都門傳旨着致仕仍賜誥褒贈廩給與如例公欣然以爲得保全出望外矣明年某月抵家未幾瑾又以公當罰運米口外幾百石公家素貧雖歷官三十七年俸資之外一毫無取家又先被火歸之日寄居寺宇書房者數年口外之役不勝艱苦公亦視之坦然不少憂憤公名泮字用養成齋號也世

爲閩縣人祖祐父純由舉人爲興國教諭皆以公貴
贈南京戶部尚書祖妣鄭氏妣王氏皆贈夫人長兄
清源天順庚辰進士授南京工部主事卒公幼孤性
雖嗜學主事君之教亦至故公事之若嚴父師弟溶
淵與公爲同榜進士授刑部主事陞員外郎又陞廣
東按察僉事丁母憂去補任浙江又陞副使卒

南京戶部尚書張公泰傳

黃佐

張泰字叔亨順德人成化丙戌進士知沙縣爲人端謹樂易政尚寬平而公庭亦無畱事民愛戴之嘗修飭學校重建先賢祠修建縣治事集而民不擾公暇輒戾學躬勵諸生學業刻羅豫章陳了齋遺書以詔學者邑士用勸時縣經兵燹荒疫泰至百廢具舉甫三載以賢能徵授浙江道試御史巡視通州倉革包攬之弊言及宮闈與政上怒杖責之幾死提督京畿學政公明爲衆推服丁憂養病十有餘年弘治壬子復起出按雲南奏開解額五名繩賊吏之尤無

良者先是象馬思標執木邦宣慰司罕它法因禁阻
十年未有以處之泰於是會議檄各漢土官兵臨其
境以公移諭之思標感悔遂送罕它法復其故業械
其首禍者三十餘人請罪積患一朝頓釋遠近稱其
能既復 命特劾中貴楊戴二人及戚里壞法者

上怒甚既而霽威罰俸半年尋陞太僕少卿又改大
理寺薊州 皇莊與牧馬草場爭地界日久累勘不
明奉 命會武臣清堽泰密訪得永樂中開設圖本
按之權貴始服陞副都御史總督南京糧儲遂疏專
委任清兌支均俸糧委監收廣儲積修常平清軍數

總部運限稽派重查糧稽住俸省守支十二事俱允
行正德丁卯遷工部侍郎公出納杜請託改南京都
察院右副都御史時逆瑾虐焰熏灼所求不副奇禍
立至泰當奉表入賀惟以土葛布遺瑾瑾知清
苦然猶憾之會吏部以南京戶部尚書員缺疏泰姓
名以請內批陞戶部尚書著致仕家居三月卒
朝廷遣官賜祭葬泰謙和孝友兄順庶出母欲薄
分其產泰泣諫均分從之夫妻相待如賓每見必揖
至誠接物未嘗言人過失喚僮僕不至聲色不加於
前蓋其所養有素云

資善大夫南京戶部尚書正誼先生雍公秦墓

誌銘

呂 柟

公諱秦字世隆別號正菴陝西咸寧縣人也先應天
句容縣人高祖太居生子安洪武初從戍西伐編今
籍生清清生鑑封文林郎山西道監察御史配王氏
封孺人瀕育夜夢神授白蓮一莖日生公孩孺卽教
敏不諱十三年選升府學十九年鄉舉成化己丑進
士明年出知吳縣吳濱湖湖漲淪田數百畝頃先尹
成欲防湖輒沮於富室公至作堤富室猶譏於太守
公立答之一百期月而堤成雨暘膏澤吳到於今賴

之曰雍公堤夫有妾死妾父訟夫密殺吾女兩月置尸湖中石下名訊夫夫曰妾逃兩月跡求無效妾父脅財始知死所公使視尸死當近日乃訊父曰夫夫密殺汝女汝安知匿女於石下此又豈兩月尸耶必非汝真女汝假他以勾賂耳一拷而信同年進士過吳求衣綱不答察勸之公曰吾爲吳人父母制其子以賂友於友何厚於子何薄吳人無大小稱青天焉甲辰詔擢爲御史吳俗令行皆饋棧船饋公公不受民固饋乃駕至張家灣還之吳人歌曰時苗畱犢雍公返舟旣守御史彈射不憚高明褒揚不滲卑遠時

威寧伯王公典院事語親舊曰棘避驄馬御史也初
趙南城四城咸求折訟曰去有主者民崩首不去他
官不辯也公爲折之於是豪右斂跡聲震京師巡關
居庸紫荆士民警服嘗笞黎盜後有首得遺驢者訊
之乃前盜官黎者也兩淮巡監且滿巡撫都御史以
公力過權要商民咸悅復奏畱一年初公至淮皂丁
貧而鰥者幾二千人比及二年具與完室旣去淮南
人詠曰客邊檢橐渾無硯海上遺民盡有家又曰了
却四千兒女願春風解纜去朝天云已亥陞鳳陽知
府未到丁憂服闋改南陽唐王奏取民田千頃

命下按察勘給公力報不從奏曰民去王誰與守汝
寧知府及千戶相惡各奏逮至千人累年未判撫按
下公三日而決甲辰司馬于公總制北邊辟公山西
兵備副使公至大同汰侵漁振頑慢廣墩堡制兵車
以禦胡胡自公至不敢近邊千戶韋英誣收謀逆百
人于公會鎮守巡撫將坐實以聞公曰人命至重惡
可輕舉若出誣收可謂賞一奸殺百良于公悟從之
至京果得誣殺英百人俱免於是于公有疑率名質
決明年陞山西按察使或謂太宰李公曰雍某何以
驟耶李曰雍廉使風力無雙可以諸人觀之乎於是

山西獄無冤鬱綱紀肅然有訟其子失養者公垂涕泣喻子曰爾由襁褓何所食得至今日乃不顧父母之養私其妻子罪當誅其父復號泣乞原曰愚民老且死僅有此兒一時怒不知至此公始釋之曰慎勿又犯乃卒爲孝子太原知府尹珍出遇公於途前驄緩避公名數珍珍起抖擻衣上污曰此豈失朝耶公曰汝毀裂朝廷體統猶敢假爲悖言非罪耶笞珍珍訴於朝誣以人命諸事遂收錦衣獄無證猶三月而後免左遷湖廣叅政湖民被誣爲強盜者七八人歷多官不解御史下公勘畢得誣狀盡釋之七人

皆國公像祀於家武昌知府王達貪虐而喜媚權要
當建職自布政按察率與上考公粦然曰泰敢黨達
以負國耶獨注曰上官畏其暴下民被其虐諸公變
色後達卒黜辛亥陞浙江右布政使太宰屠公家衆
鬻販私鹽鄉人效尤幾至千輩盜竊橫行公先收百
人抵罪諸察咸諫公曰此等爲屠公禍屠公豈知禁
此當非大助耶如其知也存屠公情存 朝廷法諸
察慚退既而丁王孺人憂未闋吏部辟爲山東左布
政使固辭不起已未 詔起爲右副都御史巡撫宣
府疏辭不允居宣府二年諸所奏議咸當時務士民

祇畏邊陲晏安士無室者援兩淮例來訴公復與完
聚千人叅將李傑不法部下狀公公將叅奏李跪堂
前詭乞受責以圖自新公遽信曰此亦軍法也令縛
下大杖擊之三軍股慄初李之屈也策公必原旣乃
譖公於時相暨科道時相有戚黨科道有稔習公遂
以擅打軍官劾罷乃日居韋曲別墅不涉城市秦
簡王出入溫泉駕過韋曲款語移時畱詩云寄與東
山謝安石莫因高臥負蒼生正德丁卯言官潘鐸諸
人交薦公有敢死之節克亂之才詔復起公爲左
副都御史董操江疊疏固辭弗允時宦官劉瑾用事

卿佐遷除厚賂行謝鄉人喻公公曰進退在天若奈
我何未幾陞南京戶部尚書又不謝遂令致仕歸
米千石逮着有司促輸宣府潘鐸諸人及前吏部尚
書馬公文升兵部尚書劉公大夏數十人皆以辟公
罰米有差公自是復居韋曲旦夕焚香危坐食既則
杖屨童徐步猷猷或休諸樹下或濯清泉撫景自
詠於是田父羽流皆得與公談稼穡講鬼神年八十
卒計聞 天子悼賜祭葬云奏議藁五卷正誼菴詩
集六卷

南京戶部尚書吳文度傳

吳文度字憲之其先福之晉江人父某敎諭黃梅以疾就醫南京遂家應天府之江寧文度早孤與伯兄居抗志力學成化乙酉舉應天鄉試登壬辰進士授浙江龍泉知縣龍泉故號難治文度招集父老示以禮義其強梗者治以法境內肅然已亥徵拜南京山東道監察御史秉持風采多所建白丁未擢知汀州府時徃人出沒爲患文度設方略招致賦役帖帖如居民以其餘力修舉學政考德問業親篤勸之人才翕然以變秩滿乃相與立祠勒石祀而頌之曰視祠

之廟貌如吳公也弘治戊午擢江西布政司左叅政
壬戌進山西右布政使閱歲轉河南左布政使力專
才膽一時弊政釐革殆盡下和買之令禁無名之役
人至於今稱之乙丑拜都察院右副都御史巡撫雲
南屬夷酋阿本負險稱亂文度至撫先文告猶弗率
乃進師親臨行陳擒其渠魁地方大定夷民納貢賦
如中土捷聞 天子降勅獎諭賜與甚厚正德戊辰
擢戶部右侍郎尋轉左侍郎未幾拜南京都察院右
都御史逆瑾用事索賄文度弗應是歲十一月改南
京戶部尚書致仕文度既退蕭然深居澹恬容與無

異韋布時知已過從輒泊饌具飲宴盡歡達官貴人
至則避不見久之逆瑾敗諸所嘗傾害者朝廷次
第收復之士論多屬文度名命且下而以疾告遂
不起壽七十有交石稿若干卷行世

國史實錄

文度字憲之應天府江寧縣人少貧與兄茹苦讀書
夏夜無帳爲蚊嘅成病鄰人數侮之其志益堅以成
化壬辰進士授龍泉知縣有聲召拜南京山東道監
察御史丁未陞汀州知府九載滿郡人生祠之又立
石以紀去思弘治中歷江西左叅政山西右布政使

河南左布政使陞都察院右副都御史巡撫雲南平
夷酋之亂正德戊辰進戶部右侍郎轉左侍郎陞南
京都察院右都御史無以賂瑾卽改南京戶部尚書
致仕文度歷官三十七年屋僅數椽而已賦性近厚
處昆弟羣從有恩鄉人稱之

資善大夫南京戶部尚書致仕王公佐神道碑

銘

楊一清

正德七年壬申冬十二月二十五日南京戶部尚書
致仕王公以疾卒於家年七十有三計聞上賜諭
祭二壇命有司營葬事其子都察院右僉都御史雲
鳳方受命巡撫宣府解官奔喪西歸既襄葬越明
年以書告子屬爲志銘不得辭乃撫其大者書之曰
公名佐字廷輔山西和順縣喬庄里人高祖伯成元
末自太原保德避亂至縣東虎谷居焉洪武初以鄉
貢召至闕問民疾苦賜勅以歸曾祖貴祖珍以

公貴贈光祿寺卿父義仕巡檢致仕累贈光祿寺卿
母張氏累封太恭人贈淑人公幼敏慧光祿君初丞
縣城驛有中貴宿驛久人厭苦之公夜密令人取庭
樹巢鵲墨身朱喙而縱之中貴見而驚熟視之故鵲
也詰諸館人皆驚以爲不祥遂去之弱冠爲縣學生
二十六舉鄉試成化戊戌登進士第 內閣填黃榜
終少一卷求之不得或曰狀元卷封內若二然啓之
則公也偶爲封者所誤不得已足之榜尾試政吏部
太宰尹公嘉其器識數召與語兼咨訪人才辛丑除
文選主事尋丁外艱去甲辰服闋補考功司丁未當

朝 覲之期例覈天下諸司官公博采輿論必求其
當凡貪酷吏雖親故不曲庇貴勢請託一無所撓或
本廉吏而爲毀者所中傷則力爲伸雪之遷驗封貢
外郎弘治庚戌進郎中有土官承襲例當駁覈屬一
京宦僦白金若干祈免公卻而逐之其人愧恚自是
不復敢見公太宰三原端毅王公知公亮直調考功
司又值 覲期黜貪濁斥庸懦拒請託視前加嚴焉
山西提學僉事楊文卿每憾公不薦已比遷山東副
使以公務至京見少宰曲陽周公謂之曰王郎中數
稱君賢楊乃歎服甲寅遷太常少卿提督四夷館事

丁內艱去服闋至京師留逾年不得調相知者輒令
其體幣往謁執政公應曰諾實未嘗往又趣之行且
令一隸施從公所之明日公過執政門不入而去相
知者佯問曰執政云何公曰執政意無他也因其言
其狀爲之一笑改順天府丞轅下事繁動涉權要公
處之裕如乙丑遷光祿寺卿節縮供應所省甚多正
德丙寅遷戶部右侍郎奉勅勘功臣地土於常州
丁卯轉左侍郎時劉瑾用事凡大臣科道使外還者
皆有厚餽不然立見罪黜公獨無所餽瑾常語人曰
世言山西人吝果然自是銜之屬時遣使稽覈各邊

糧芻先後撫巡憲臣多坐累繫獄公一日同尚書願公輩見瑾瑾言及茲事曰朝廷必誅戮一番人乃懼耳公曰本朝未嘗輒戮大臣恐不可開端有與吏部尚書許公進者瑾信之語諸大臣曰許某奸邪若某尚書可爲吏部公曰某與某尚書素厚與許交淺然許素有時望某尚書恐不如毀許者因譖曰王某實黨進瑾益怒遂遷南京戶部尚書欲姑遣之去而徐圖之耳比至南京以戶部廣東司失金幣冊達先尚書公輩詰問遂逮公下詔獄以爲罪令致仕歸又中以他事罰粟千石歸家行李蕭然圖書數

卷閉戶披閱子弟親識非有故不得見越四年卒性孤介寡合鄉隣無當意者惟善李昂一人謂其有篤行命都憲君娶其女至白首恒念之存問其子孫在仕途所交不過數人所敬服者二三人而已慈惠遠下使人若恐傷之御史則嚴曰不如是彼將肆志勇於爲義故人子孫貧無所於托者每訪求周恤之猶善記憶凡所涉歷終身不忘初爲太學生所著有橋門錄比官於朝有朝事日錄在吏部有太宰問藏於家配馬氏累封淑人先公五年卒子男四長雲鵬義官次卽都憲君次畱京次誥皆天女四存者二人

潞州儒士張拱壁定襄舉人薄徽其壻也男孫五之
臣舉人之道國子生餘皆天女孫六曾孫男三曰燮
炤炯曾孫女一嗚呼公質直愿慈自郎官至極品三
十年有奇清白之操如一日晚始大受而格於權姦
不得究其用然迹其所自立者其亦可以表見於世
矣都憲君風節重一時凡公之志欲爲而未及者將
於其子之身而大施之且其平生引薦士類不求人
知拯人之厄辯人之誣雖涉嫌疑有所不避古所謂
有陰德者天報之福公之澤將不延乎

兼祿大夫南東戶部尚書李公瀚墓表

張璧

公諱瀚字叔淵其先山西翼城人六世祖始遷沁水
曾祖諱倫知遵化有惠政倫生動動生聰聰領鄉薦
歷鄆縣慈谿二學訓導俱贈通議大夫都察院左副
都御史祖妣王氏妣譚氏俱贈淑人公生而骨相奇
率童時卽解詞章侍宦訓導公治詩攻文蔚有聲恩
乃成化己亥爲諸生庚子占鄉試第一明年舉進士
壬寅出知樂亭樂亭歲惡民流公至復者十六七卽
責戚豪橫亦還所侵民田邑門外有古木數十章作

果吏茲土者多病死人爲公危之公一日毀臺斬木
得朽骨若干令野瘞焉竟亦無他丁未被徵拜監察
御史奉命巡陝西茶馬弊端革殆盡歲滿代還以憂
起按陝劾贓吏汰宿姦郡縣官望風懼伏有鉅猾流
毒一方衆慮其難制公計禽窮治皆伏辜鎮守貴璫
肆虐庇所陰厚逮繫平民暴諸市公出見之立命解
其縛捕告者抵罪終南山妖僧鳩無賴作亂報使至
公密諭使者曰勿令鎮守知恐張聲勢輒擾民遂選
將授方略而遣之比及鎮守知則已報禽矣其先識
如此戊午復按河南事叢委公至裁決無遺尤莊毅

率下有不法者相戒罔敢犯已未還道都御史屠公
特敬公掌諸道奏牘古北口守將吳昭以失律賂權
貴波及無辜累案不能竟上命公往督察昭竟棄
市都御史閔顧侶諸公薦公才可大用庚申陞湖廣
副使又以憂去起爲河南副使陳州衛都指揮于世
恩格殺項城典史公至適巡大梁卽收捕寘諸法所
部帖然乙丑陞湖廣按察使丁卯轉河南布政使無
幾還順天府尹尋陞右副都御史董濬公憤濬政久
弛銳意舉行淮南守素結逆瑾貪愎自恣公劾罷之
時宋王由運河之國戶部恐其防備運奏令各船分

行兩河資瑄冀得賂動輒阻遏公適會議北上過天津遇王舟朝見司儀如陛前贊禮公止四拜卽興且啓王嚴飭侍從勿阻遏運舟王聽納自是始不擾糧運官軍稱快已巳徵入爲左副都御史時瑾虐餒董灼公卿以下咸憚之中官楊鎮怙勢鬻取私鹽舟車相屬於道事聞瑾乃奏檄南都重臣按厥事守備貴璫劉瑯攘爲已有同事者匿諱比命御史督之方檄諸省償銀瑾以諷臺長臺長語塞公厲辭以謝衆爲股栗瑾隨奏遣公往欲中傷公公往仍令瑯出所攘并劾落其職守餘戚不問時論壯之庚午陞吏部右

侍郎尋轉左是歲瑾伏誅公視篆月餘起廢疏壅上
類允愜辛未進南京戶部尚書公往蒞政凡論析公
庾府帑戶口田賦盈縮之數歷歷如指諸掌居數月
請裁冗食節浮費廣儲蓄多見采納時廩藏空虛公
憂之乃乘秋熟議發帑金代軍餉數月乃積米數十
萬江浙諸藩歲輸布給軍士貴璫主之得因緣爲害
公奏令徑輸折色戶部人咸便之外守備有縱家人
私擅歲課不輸官有司噤不敢言公收繫獄不旬日
宿逋完矣時未及引年公脫蹠名爵乃累疏納祿歸
暇則追宋歐陽康靖在穎故事與曲沃司徒李公少

率孟公命駕相往來徜徉詠歌以終老尤篤倫理正
士風婚喪冠祭悉崇古雅間黨化之公性鯁介不
矯說從見賢德愛之不啻已出晚所得益閭深故凡
考德問業來者戶屨常滿歷官餘四十年所至鎮靜
明不通察寬不至縱而賑災恤刑尤爲人所稱道平
生廉謙涓察凡圖書冠服咸手自經理略不吝人少
屬居官不苟取所得俸餘止購海內圖籍故乃家儲
有鄴侯萬卷云

資政大夫南京戶部尚書致仕鄧公庠墓志銘

張壁

初南京戶部尚書鄧公上疏請老凡再上先皇帝
乃報可得歲給與皂仍賜勅給驛歸且六年卒上
聞計賜祭葬卹恩渥矣惟鄧氏族望柳之宜章曾祖
某祖本道歷官寧國知府父紀漳州府推官以公貴
俱累贈如其官公諱庠字宗周號東溪生九歲而鄭
夫人歿鞠於外伯祖司馬朴齋公家甫弱冠卽名起
諸生間成化戊子領鄉薦壬辰舉進士授行人奉使
諸藩禮却饋贐詣藩王賢之陞浙江道監察御史巡

視京倉尋按順天等府時官屬多貪玩公以嚴從事
諸戒不敢淪法有弗便者欲中之捃拾亡所得竟中
止貴州蕃夷弗靖守臣請兵征剿上命公往勘公
以醜類偶出沒不足煩兵可撫定也遂下招撫令蕃
夷聽撫地方獲安公且劾都御史謝某等妄生叢端
上嘉納亟黜謝未幾丁內艱服闋補本道御史陞
河南副使適河決張秋東山劉公檄公問計公曰河
即未可治須下流分殺其勢乃築堤防庶幾可塞東
山如其言事果濟上善其贊畫陞俸一級轉本司
按察使治獄多所平反明年陞廣東右布政廣西左

布政得旬宣體擢都察院左副都御史總督南京糧
儲丁外艱服再闋被召巡撫河南時鎮守太監廖堂
與其弟指揮鵬多爲不法諸莫之敢撓公首劾之堂
深銜亦弗顧逾年以平賊功賜白金文綺給之誥命
擢戶部右侍郎提督倉場養病歸再被召改左副都
御史巡撫蘇松復陞南京都察院右都御史進南京
戶部尚書至則稽羨財節浮費禁包攬諸弊時方望
其有爲公顧求去矣衆惜之性平直不設城府事漳
州府君孝在官俸入恒緘致其家爲養友諸弟甚篤
府君遺田產盡分讓不私尺寸御臧獲有恩問卹貧

者優卹久不厭在官公謹不爲權勢所撓比歸杜門
清坐惟日一徒步至東溪觴咏自適公祿仕久無
餘君子謂其廉靜然尚慨其未究厥施也

南京戶部尚書王公鴻儒傳

朱睦㮮

王鴻儒字懋學南陽人也少奇穎工楷書親屬爲府史從治文書時金城段堅知南陽府見鴻儒書奇而問之史以實對遂召見一試大驚乃留居府中親授尚書久之鴻儒因言張生景純爲學艱苦堅又招景純授以毛詩兩人咸資稟良篤思致精密博通百氏而主本於六經成化十九年鴻儒舉鄉試第一又四年景純舉第八於是南陽人服堅知人云後景純未仕而歿二十三年鴻儒登進士爲工部郎中弘治間出督晉陽學政表勵敦謹裁抑靡浮俗習爲之一變

臺臣屢薦於朝時 上勵精求治物色賢雋一日論
劉大夏曰王鴻儒他日可大用大夏對曰此人才行
不易得誠如 聖諭無何 敬皇殂落鴻儒傷悲亦
謝病歸正德四年起爲國子監祭酒越四月以父喪
去位七年復起爲南京戶部右侍郎尋改少宰十四
年遷南京戶部尚書會羣閣擅權政門頗雜鴻儒瘼
憂飲泣雖在貴顯如困葛藟是年七月疽發於脇遂
卒謚文莊所著有凝齋集若干卷弟鴻漸字懋德鄉
試復舉第一登進士累官山東右布政使所著有清
南集與凝齋集並傳南陽文獻之盛自王氏始

論曰王公操履清純學識該洽弟懋德亦馴雅多聞
世稱宛郡二難良不虛矣

維風編

劉忠宣公薦公於孝皇歷遷吏部左侍郎以甄拔

爲已任崇獎實行不純采虛名嘗曰濟天下事惟誠

實者能之趣名者亦趣利無益也不見夏忠靖王鹽

山乎惟知有朝廷而不知有親黨惟知有天理而

不知有身家如是社稷生民乃攸賴云公於書無所

不讀大要以窮理致用爲主雖自家之異同亦必求

其原而審其義之所安故所得宏博奧衍交發互益

其於六經沛如也善觀史每以前代君臣之行事爲
案而已從中斷之審辨得失邪正上下數千年如指
諸掌尤明習國家故事自祖宗用人行行政及前輩立
朝行已之詳皆能一一言之嘗聞劉文靖謂丘瓊山
有散錢而少貫索瓊山還謂曰公有貫索而却欠散
錢云乃公讀書以窮理致用爲主亦有貫索矣起家
非詞林而得謚爲文有以哉雖然世博綜者恃此休
休心爲貫索更妙也韓魏公爲相時或謂公之德業
無媿古人但公文章不逮歐陽永叔耳公曰吾爲相
永叔爲翰林學士天下之文章孰大於是卽此一語

永叔之文章便爲魏公一齊穿紐矣我朝最稱該博者莫如瓊山乃媚嫉白沙而陰擠三原雖博亦奚以爲文靖謂其無貫索不虛也或謂文靖爲篁墩短不能詩銜之釀成廷鞫之獄文達之喙葉文莊也亦以疵其詩文故余惟二公賢相也或未必然果若人言觀魏公之度如何哉顧葉程兩公以能工詩文遭讒構於執政者如此然則知道者之於詩文直榆莢視之可也

榮祿大夫南京戶部尚書贈太子太保煙村鄧

公璋墓表

夏言

鄧曼姓以國氏其先有自楚徙今之涿州者涿之有
鄧其稱故遠然至公益大著公諱璋字禮方別號煙
村公曾祖仕能祖平皆不仕父誠國子生咸以公貴
贈右都御史母蕭氏贈夫人繼母王氏封太夫人公
少讀書卽知爲文業舉長領庚子鄉薦繼登丁未進
士校南昌推官寧人有取立故誣民以殺人公覆其
中輒麗寧人以法武寧大獄數十積稔莫決取故案
一視而成之人驚謂神上方重良吏名爲福建道

監察御史督催而國課集巡按而民害去續備

上心擢大理寺丞甲子奉命會勘寧藩鍾陵王無

所回忌一意窮詰有干逆濠者悉寘於法人皆難之

乙丑奉命覈勘太監苗逵功次務絕知友賓客之

請停勒豪貴冒首功者九百餘人時論快之遷本寺

左少卿俄轉都察院右僉都御史巡撫遼東贊理軍

務乃清屯田治垣障通關市官酋長布恩信諸夷懷

畏邊人安堵屢爲上知獎改巡宣府復數有軍功

遂加俸級至冬擢南京戶部侍郎逆瑾執國柄惡不

附已輒中傷致仕瑾誅以守正起爲左副都御史時

青州賊楊虎等連衆數萬轉寇河南屠燒城邑族殺
不辜環數千里莫不被其毒握兵之將皆望塵蹙縮
莫有杖一戈援一枹爲士卒先者 命公巡撫至則
奮然帥先戰守隨宜不數月賊平 上敕褒之旣而
南北畿甸山東河南北新創於兵仍以旱饑民交走
死無弔 朝廷憂焉遣大臣賑之難其人 上習知
公才力 特命兼理公因事增智盡心於其不可爲
之地卒全活數百萬人所部賴無事明年改南京刑
部右侍郎繼改兵部時土魯番黠鰲背約束擊哈密
虜其主忠順王能大爲邊患邊民數驚 上特命公

爲右都御史總制陝西延綏寧夏甘肅諸軍事公及
陝建塞徼起亭隊飭弓弩具閭石布渠答設屯戍塞
賀蘭山隘口三十處使賊不得通增花馬池壘壘木
樵校聯四十餘里不絕使賊不得越復築城樹榆外
使居民有保障至冬虜大入寇羣蜚蜎毛而起倏集
城下公乃掘井鼎罌薰穢穢潛過梁彤珠禽斬以百
計如是者再賊知中國大有人在乃斂迹去公遂以
速陞賞廣推恩宣捷音優犒勞嚴法制完徵輸清苑
馬給商價蠲屯種歸貢夷十事上陳 上皆嘉納居
亡何西寧番賊劫掠屯塞侵盜不已公簡將出奇追

奔數百里捷聞 上褒獎之賜白金綵幣公以疾得
請還至戊寅土魯番復攻哈密寇肅州羽檄日至
上思公舊績復起公提督軍務便宜從事公方至州
北虜阿爾禿駝乘微寇永昌逆吾顏行將官悉銳皆
往遣之禽公乃以隨李陷楚法克之土魯番素憚公
聞公復至輒戒部落曰勿以邊爲意數使乞和及還
貢使衆皆欲聽之公曰夷狄之性來而不能因使得
氣去後未可服故漢人曰匈奴侵盜無已者無他以
不恐之故耳況今虜雖乞和實未有憬意奈何遽聽
之且彼域所需成仰給中國但閉關絕貢彼始失國

有悔心耳遂大爲戰守備多爲疑形數觀兵塞徽虜
果大恐悔過輸罪悉歸所虜掠公曰可矣乃許其通
貢歸其使又以忠順王不可復立議擇一都督爲守
哈密後圖興復 上甚嘉之賜蟒衣金寶絛環自是
訖公歸京師越十餘年莫敢有犯邊者境內用以少
安已卯宸濠變起 上自將駐蹕南都以公爲南京
戶部尚書公與兵部尚書喬公協心同規綜理應給
凡中官一切無名之索皆力却之政有紛更者亦抗
疏止之南都人深賴焉辛巳夏以疾懇乞骸骨 上
畱弗得從之歸則徜徉田園課訓子孫足不一至州

縣門過賓罕得見者嘉靖改元詔進階榮祿大夫秩從一品嘉靖十年十月以疾薨於里第天子聞之震悼錫以葬祭諸卹典有加焉

南京戶部尚書胡富

南京戶部尚書胡富徽州府績溪人成化戊戌進士授南京大理寺評事歷陞順天府尹大理寺卿正德初忤逆瑾勒致仕瑾誅起陞南京戶部右侍郎遷本部尚書屢疏裁冗食祛宿弊事涉權倖多格不行因乞休疏六上始允仍給月米歲夫嘉靖元年四月卒計間賜祭葬贈太子少保謚康惠富敷歷中外四十餘年始終一節上諭重之

資政大夫南京戶部尚書梅軒蔣公昇墓記

弟蔣冕

此先兄南京戶部尚書梅軒公之墓公諱昇字誠之
姓蔣氏梅軒其別號也世居全州曾祖考諱貫刑部
員外郎祖考諱安隱德不仕考諱良雲南河西知縣
俱贈光祿大夫杜國少傅兼太子太傅戶部尚書謹
身殿大學士曾祖妣蒙祖妣滕妣郭俱贈一品夫人
公自幼勤苦問學以州學生舉成化辛卯廣西鄉試
丁未第進士弘治己酉授廣東南海知縣以政績卓
異徵入朝擢南京福建道監察御史陞河南汝寧

知府遷湖廣按察副使進浙江按察使轉浙江右布政使陞四川左布政使尋陞都察院右副都御史巡撫南贛汀漳等處進南京戶部右侍郎 今上嗣統以廷薦陞本部尚書受 誥進階資政大夫數月以老疾懇辭允之賜 勅褒諭 命有司月給廩米歲給輿隸仍馳驛以歸家居四年以疾卒嘉靖丙戌五月十二日也距其生景泰庚午九月十二日享年七十有七計 聞遣官 諭祭者二 命工部營葬事葬以卒之年十二月十八日墓在州北七里橋配楊氏累贈夫人繼子累封夫人男三長履端太學生次

履長後軍都督府經歷次履坦詹事府主簿爲弟冕
後女三通政經歷陳邦傑士人曹鸞舉人唐鈺其壻
也孫男務耕等若干人公天性純誠其於世人機械
事茫無所知至於蒞政折獄往往如燭照而數計毫
髮無能遁其情者其它郡縣保民如子惟恐傷之逮
司臺憲鋤奸雉惡不遺餘力未嘗少有縱舍蓋公平
素潛心義理之學而必驗之於行持身處官事無難
易一切揆之以理有未安小節末務不肯苟徇妄隨
於先儒大窮理而務果斷之說終身誦之其言行政
事無愧於古人者甚多此不能備錄云

南京戶部尚書王公纘傳

黃佐

王纘字文哲東莞人父恪寶慶知府纘爲人敦重寡言笑弘治癸丑進士爲翰林院庶吉士授兵科給事中出使安南其國王郊迎席拜以禮卓叱去之所餽金寶一無所受進禮科右給事中奉勅清查南畿

屯田革宿弊擢工科都給事中正德初擢山西左叅政遇例裁革改雲南左叅政時逆瑾擅權牽咎罰米五百石俸不足常虛以償瑾誅進右布政使俄進福建左布政使遂陟都察院右副都御史奉勅巡撫

應天蘇松嘉杭等郡兼督糧儲殲逆賊劉七於狼山

擒姚暉賊王浩入於徽寧獲 賜鈔幣隨以乾清宮
災警上陳言以答謫四事曰正大本以安天下省內
臣以慰民望處驛邇以蘇民困廣延納以開壅蔽皆
切時弊 武宗欲西巡疏止之不報歲壬申丁內艱
展闋以父年老乞終養 勅起撫治郎陽至任時
武宗欲巡幸諸郡供億動以萬計有求活虎豹以獻
悉令罷之且究其爲首者襄府護衛奪民產爲疏辯
以還民已卯夏寧藩煽亂震擾荆襄緝下令設守備
人心獲安擢南京刑部右侍郎嘉靖紀元辭前陞俸
既允隨上疏陳十事曰正心以正大本勤政以法

祖德親賢以廣延訪守信以重
詔令崇德以禁奢
侈舉知以求賢才體仁以恤民窮修禮以正風俗裁
冗員以復舊制慎刑以重人命亦多見採陞南京戶
部尚書疏又以父年老辭不允時南畿大饑縵區處
賑恤請內帑銀五萬給之尋卒於官年六十有一計
聞 上命賜祭葬

南京戶部尚書王承裕

南京戶部尚書王承裕嘉靖十七年五月卒賜祭葬如例贈太子少保謚康僖承裕陝西三原人吏部尚書恕之子也弘治癸丑進士選授兵科給事中歷吏科都給事中以言事觸逆瑾罰粟輸邊尋以父喪去位服闋除原官累陞戶部右侍郎提督倉場南京戶部尚書致仕至是卒承裕潔廉好學孝友端慎卓有父風士論重之

南京戶部尚書王公承裕傳

王承裕端毅公第七子字天宇號平川爲兒時卽重

厚如老儒七歲能詩賦立孔子木主拜而祭之十五
從靜田蕭生學遂深造二十作太極動靜圖說爲名
卿傳成化丙午鄉舉完婚自著婚禮用中呈父執而
行之弘治初端毅公爲冢宰時隨任令接海內賓客
籍其所長父依而用之一時號稱公明當時旣不疑
其子而海內人亦無他議登弘治癸丑進士時端毅
公致仕卽歸養暇授徒於弘道書院以孔顏程朱學
教之正德間歷授兵刑吏三科給事中以正直忠厚
名有時政先務勤政任將等疏凡三出封郡王不
受餽遺必給賞諸邊軍士蒙實惠逆瑾用事以上書

罰米三百石輸邊陞太僕少卿奉命點視京營馬

匹人稱明爲陞本寺卿上偶降旨大閱用戰馬

二萬卽應命大臣驚異陞南京太常寺卿時武

廟南延具牲帛祭品以待或謂上不暇弗聽及

上至奏行之言者愧服宸濠亂察其內應者處以極

刑南都肅然後賞功陞戶部右侍郎却其舊用公堂

銀千兩貯庫言官論禮部尚書席書賑濟事不明往

勘功罪昭然卒當上意欽賜睿筆清平正直四

字陞南京戶部尚書奏鈔關商稅羨銀解京以饒國

用革私克工匠以省糧稟查聚歲逋稅至一百七十

賦徵銀
卷北
李光
曼山

寶祐二年續羨銀至四萬八千餘兩查南京諸
考應祀神祇奉位立祠以祀及致仕卒 賜葬祭謚
曰康僖一時諸公皆稱其濟美有范忠宣繼文正之
風爲狀廣額豐頤鼻如截筒貌丰而澤體厚居嘗端
嚴若神然溫乎可親又栗然而不可狎也性篤孝能
悅親養志故端毅公愛之特甚又善事諸兄誨諸子
姓以道有不率教則反躬自責令其愧恥雖僕御有
過至內竊而敗亦薄示懲戒許其自新務以德化與
人交卽之弗親遠之弗疎然忠信無僞寬柔有容故
與之交者無弗愛敬善接引後學因材以篤又廣擇

髦士俾各教學以訓蒙士俟厥有獲則授所未聞故
師逸功倍學而成立者衆教人以禮爲先凡弟子家
有冠婚喪祭之事必令率禮而行又刊布藍田呂氏
鄉約鄉儀諸書俾鄉人由之又表章先哲如毛氏建
忠李衛公靖以文武濟時楊元帥子江樹勲於國邑
令朱春夫婦死節或立祠致祭或撰記署扁建碑皆
顯其忠義激勵後學所著有論語近說論語蒙讀談
錄沒語星輅集辛卯集攷經堂集庚寅集諫垣奏草
草堂語錄三泉堂漫錄李衛公通纂厚鄉錄橫渠遺
書太師靖毅公遺事童子吟稿婚禮用中進脩筆錄

靜園說共若干卷

資政大夫南京戶部尚書華泉邊公貢神道碑

李廷相

聖明有文學政事之君子曰邊公公諱貢字庭實別號華泉其先淮陰人也六世祖朝用元至正兵亂避地歷城華不注峰之陽因冒土姓故今爲歷城人朝用生一誠高皇帝定天下始復邊姓一誠生文質以公大父貴贈奉政大夫應天府治中文質生寧卽治中公寧生節山西代州知州皆以公貴累贈資政大夫南京戶部尚書公生有異質卽襁褓時祖母王夫人時置膝上口授章句一過輒成誦旣乃從大父

治中公於官所於是公角尚升卽蔚有文名弘治乙卯年纔二十舉山東鄉試第四人明年丙辰遂登進士第授太常博士時 敬皇帝重祠事公駿奔惟謹嘗以告不與 上私語左右曰何不見年少官人耶其爲 上所簡注如此乙丑六月擢兵科給事中公性峻直又練習國章通曉時務抵掌談天下事率鑿鑿副名實雖重忤時貴弗畏避 敬皇帝登遐公劾太監張瑜與太醫劉泰高廷和用藥之誤又劾太監苗達與保國公朱暉都御史史琳用兵之失詞義剴切聞者凜然是年九月仍擢公太常寺丞旣而逆瑾

擅權陵轢衣冠亾所不至公又不能善事顯貴人於是顯貴人伺瑾顏色出公爲衛輝知府庚午改荊州時藍鄢寇亟飛輓之務公以身任之民不擾而事集克獲之功公與有勞若夫革吏奸察隱弊修廢隆宣恩惠爲天下治行最辛未擢山西提學副使尋丁代州公憂甲戌服除起公河南公正已以格物先行而後文申條教以定其趨勤考校以程其業復文體以示其標嚴勸懲以鼓其氣繇是士經公訓迪莫不克然各有所得丙子鄉試號稱得人丁丑丁母董夫人憂初公體豐顏渥風神藻雅兩更三年喪哀毀踰禮

自是積憂成疾而公亦倦於遊矣辛巳今上入覲
大統。詔求遺逸撫按諸公交章論薦乃卽家起公
爲南京太常少卿嘉靖癸未晉南京太僕卿承平日
久騎政漸廢公至末期釐弊課功公私稱善甲申改
南京太常卿丁亥再改太常卿提督四夷館時四夷
文字體各地殊八館諸生學亡師授公徵求故譯是
正諸文以成一家之學以通遠人之情戊子以年勞
轉南京刑部右侍郎己丑擢南京戶部尚書東南財
賦半輸畱都百官六軍咸仰給焉制以都御史總之
轉相疑忌事多格閤公曰會計者部之事也覺察者

院之事也何妨焉公之識大體事多類此辛卯忽以
疾懇疏乞歸初公癖於求書所蓄不啻數萬卷壬辰
偶遭回祿焚之幾盡公仰天大哭嗟呼甚於喪我也
疾遂篤胡夫人謂公曰卽不諱麗牲之石孰當銘公
者旣而曰宜莫如廷相公然之已而卒惟公與先太
保公同省又同舉進士甚相愛也廷相叨官詞林兩
佐南銓又辱公忘年之雅日夕以文事相劇切有師
資之益焉則茲役也其奚敢辭追憶 國朝文章無
處三變 高皇帝初正大統青田金華義烏諸君子
力以斯文爲已任剗削舊習橫制頽波幅尺騷雅興

起學士永樂以後騷卿藻士布滿天下然詞頗纖細
稍異曩昔識者病焉 敬皇帝時 明興百三十餘
年於茲矣四海梁肉百官委蛇得以肆力弘學遊心
藝苑於是公起歷下與北地李夢陽河南何景明互
相師友力追古作妙悟真機鼓吹盛美可不謂振世
雄豪也邪况公孝友天至又喜賓客樂道人善接引
後進常若不及至於當官蒞法必盡其力所在人皆
嚮之愛之語曰文質彬彬然後君子其在斯乎公生
於成化丙申八月卒於嘉靖壬辰二月年纔五十有
七配柴氏累贈夫人先公卒繼胡氏累封夫人子男

二人長翼以廢爲太學生次習幼所著詩文四十餘
卷藏於家門人輩相與謀梓之蓋世所必傳者也

資政大夫南京戶部尚書贈太子太保謚莊敏

許公誥墓誌銘

王廷相

嘉靖十三年正月乙卯資政大夫南京戶部尚書許公卒於位計聞皇上嗟悼乃贈太子太保賜謚莊敏遣官諭祭營葬事 恩典優備弟戶部尚書松臯

公以廷相雅知公乃持右布政杜子材所撰狀來乞銘嗟乎神遊九寰公已長逝乃若德茂人羣言垂世則裨贊帝猷式標風化誠不可無述按狀公諱誥字廷綸號匹谷河南靈寶人也父進吏部尚書贈太子太保謚襄公進之子成化辛卯十二月六日高

太夫人夢巨蛇入室覺而生公在童髻岐嶷不羣長
而機神警朗望見之者無不羨其奇偉十歲治大小
戴禮便能屬文弘治乙卯與弟松臯公同舉於鄉已
未登進士第庚申選授戶科給事中奉 命清理延
綏倉場檢閱精嚴不避權貴時有內中官者出督三
邊貪縱罔法公卽劾其狀邊人懷之乙丑陞刑科右
給事中屢疏上時務其均考察便解納備要害數事
迄今行之正德初 朝廷以舊德遺老起襄毅公爲
大司馬公例宜避言路改翰林院檢討奉 命教司
禮監官戊辰襄毅公爲太宰直弗煢阿中人亦弗敢

干以私逆瑾忌之乃欲公納交以通公出入書堂絕
跡瑾門戶瑾乃大怒曰謂我不能制爾邪乃矯詔黜
襄毅公籍罰邊儲三百石竄公廣西全州判官欲置
之死公歷險冒瘴與魑魅伍挺挺無戚容竟宜風土
無恙庚午襄毅公卒公奔憂制卽宦情泊如矣太夫
人屢命之出公乃謂松臯曰人出處道殊動默祿性
在各任其真耳予鮮合於人茲豈厭時侍太夫人優
游以樂足矣汝舍醇居宏無往不可勉哉自是閉門
掃軌潛修迭覽嘯咻聖真同深弗入乃遂受徒講道
若將終身焉久之都御史御史交章薦大要以公探

願研微見道淵邃可備顧問不宜置之閒散時有
詔守正不阿爲昔逆瑾所斥者錄之遂起公爲尚寶
司丞非其意也復疏病還十餘年來公養晦存神蠖
屈林藪松臯公兼善匡時龍翔天漢一出一處時人
兩高之壬午今上改元復起公爲南京通政司叅
議公曰堯舜在上夔契思奮斯其時也乃起從仕丙
戌帝以文學侍從弗克經幄命輔臣各舉所知
公被薦改侍講學士戊子爲經筵講官進講多所剴
切據經引史古昔興衰治亂之跡如指諸掌帝皆
聽納嘉獎復上緝熙聖學四事一日則圖書以明道

原二曰主聖經以求道是三曰辯諸儒以祛道惑四
曰屏禱說以防道害其餘尊經崇聖開邪衛道無不
至焉 帝以公畱心理學益加眷注己丑 命公主
武舉試事尋擢太常卿掌國子監祭酒事公以道範
久頹化機弗振乃弘獎風節紬抑華競以經世爲士
莖尊德爲學軌故一時人士翕然化之不徒敦悅典
墳涉志弦誦而已時太學生有遐方旅櫬暴露無歸
者幾三十人歲時名字漫滅無稽公乃以公帑羨餘
購地葬之復察生理窘迫衣食弗給者數十人咸加
周卹由是生徒感德懷服又奏罷放職不稱者及劾

勲戚習禮不律者乃一時成均條約肅然改觀因異
異乃上乞察天道以平治道疏其略云 大君爲天
下神人之主情發中節斯用人行政順應天心陰陽
和而風雨時矣 帝嘉納之先是文華殿有孔子塑
像 帝欲從古易以木主公乃以所著道統書上之
帝悅卽撤其舊像立皇帝王八主南向周孔二主
東西向 命輔臣與公九人瞻拜主前面諭之曰朕
奉先聖先師於此庶起敬慕以遜志於學卿等其罔
朕棄仍 賜茶及禮神品物復 命各爲講章以進
公衍中庸喜怒哀樂章入講 帝謂公欲以一人之

情通天下之情所言良是自後月朔望 帝必躬祭
事品物必 賜公以爲常辛卯 帝開講無逸殿宴
幽風亭公與焉明日公以無逸篇中宗受命敷之講
義以進謂民者天之心天心不離乎民中宗以天命
度其身以身治其民所謂欽崇天道永保天命也
帝善其說壬辰擢吏部右侍郎時天下入覲公門戶
清肅人弗有私謁者嘗謂官之失德寵賂彰也况干
涉公事以敗名憲乎乃具奏以戒諸司 帝從之復
上疏乞休 帝不允尋擢南京戶部尚書公與松臯
公居兩京大司徒又出襄毅公之後父子兄弟竝至

八座前此未有縉紳榮之公蒞事無私與物以誠雖
議論激發而儀度宛綽僚屬靡不敬服有司尉軍五
百餘人以例更調營操而糧賞若不及各營軍士公
與具奏增之他如倉場之弊無益之費多見裁省復
上疏乞休 帝以畱都國計非公弗可不允甲午春
二月公將 朝賀如京忽一夕痰疾作卒享年六十
有四嗟呼襄毅公有偉烈於王室有德澤於蒼生有
氣節於名教公克肖之可謂無忝爾所生矣

戶部尚書周襄敏公金傳

唐順之

公姓周氏諱金字子庚號約菴其先武進人也國
初有彥居者以閭右徙南京因家焉至公爲都御史
復還居武進彥居生贈戶部尚書道信妻贈夫人董
氏於公爲祖妣道信生贈戶部尚書廣妻贈夫人張
氏於公爲考妣墳墓皆在南京而公始賜葬於武
進之惠化鄉公自弱冠爲應天學生弘治甲子舉鄉
試正德戊辰舉進士擢給事中陞太僕少卿僉都御
史轉副都御史致仕家居六年以爲起爲副都御史
陞兵部侍郎轉右都御史尋轉左陞尚書南京南京

公所生長也因得焚黃先人之墓南京人以爲榮公
之始爲給事也於戶右於工左於兵復都於戶凡歷
三科爲都御史也僉於延綏副於宣府於保定右左
於淮鳳凡歷四地爲尚書也於刑於戶凡兩部公所
歷多在錢穀刑名兵戎劇曹與邊腹要地公爲人淵
達警敏自在科中則已練習人情世務章數十餘上
度可施行而後言不效迂生敢言而已 武廟數遊
幸晏朝公上疏請復常朝之規退則躬覽章奏以總
權綱亦頗見采納時貴寵用事國儲鉅於冗食公言
京糧歲入三百五萬而食者歲乃四百三萬乞痛加

奏勿
納馬
昂女
弟

澄汰便又言中官以迎佛以織造濫討引鹽舉橫道
路又言都督馬昂納女弟後官外議或云已娠請誅
昂而還其女後昂雖不罪而女竟被黜及公沒禮部
爲公請贈謚亦獨以公爲給事時能陰銷禍孽指此
疏也方其時奄幸相繼擅勢尤與言路爲仇不旦暮
死則竄少能全者公在科九年卒以老成周慎免於
戮辱而以久次得擢爲太僕公貌瓌偉善議論其在
科中每九卿廷議軍機大事邊境要害衆輒目屬公
公口對甚辯聞者莫不心愜壬申狼山之捷兵部議
有功將士例陞三級公曰不然將士有實職有虎銜

有正副叅遊實職大而虛銜反小有管哨管隊實職小而虛銜反大今一例陞級則管哨以下皆可爲督府而叅副以上或止於都司首尾倒置非便衆是之
癸酉廷議用兵土魯復哈密公極言西邊虛憊而土魯險遠且青海之賊窺伺西寧乃欲遠拯哈密譬之人家囊篋空虛子孫臧獲疲死而盜賊滿門庭將拯門庭之寇乎抑急比鄰之災乎衆曰是則然矣如土魯索金幣何公曰彼能效順國家何愛於賞不然勦之未晚也已而卒從公議於是衆以公可屬邊事推延綏則推公推宣府則推公公旣家居廷臣交口

薦猶尚以邊事也公在兩鎮值寧夏甘肅大同三變
之後公既素豁達不拘謗有帥臣體裁又善煦愉接
下邊人見公色詞既已心安公公益務寬簡繩法以
休煥慰帖之嘗欲笞一二走卒時竊冬多不務公見
之惻然曰邊人窘乃若是遂不忍笞而百方爲之招
商聚粟廣屯積芻以時給其食使人人有重生之心
又爲之葺墩墻以衛其居疏石渠以足其水凡有規
畫期於利盡而人不勞邊人益愛公嘉靖甲申公在
延綏會大同殺都御史報至公愕然因入靜室踣跡
久之喜曰吾得之矣乃開門召諸將吏軍卒盡入環

列庭下謂之曰若輩知大同殺都御史乎衆曰知之
公曰若輩以殺之爲得已耶非得已耶衆叩頭曰狂
賊自取族耳尚何道公曰不然邊人勞苦甚矣而又
虐使之是趣之殺也假令上下素相愛若父子彼將
何以爲命縱殺之刃使殺焉其誰忍乎衆大歡呼叩
頭退當是時以片言立解上下疑阻公自喜得應機
之知居家時數嘗爲余言之其在宣府總督馮侍郎
以苛刻失衆心公數爭之不能得侍郎又以引鹽數
萬與其私人爲市而平時商人無能得一引者衆固
甚怨會諸軍詣侍郎請糧不得且欲鞭之衆遂憤轟

然面罵因圍帥府公時以病告諸屬奔竄入院泣告
公公曰吾在也毋恐卽便服出坐院門召諸北總官
陽罵曰是若輩剝削之過不然諸軍豈不自愛而至
此欲盡痛鞭之軍士聞公不委罪若屬也則氣固已
平乃擁跪而前爲諸把總請曰非若輩罪也是總制
者罔利不卹我衆耳公從容懇諭以利害衆囁曰公
生我始解散去而總制自是亦心愧公延宣皆虜酋
公內撫軍情外策強敵關城晏閉邊氓緩帶兩鎮四
五年訖無敗事人益以爲才然公他所施設其與公
不同趣者或不能不以好惡爲贊毀至論公長於治

邊則莫得而訾也自公去宣府八年而大同復殺總兵據城亂公時起巡撫保定矣遂往扼紫荆擒大同謀者數人送京師會真定巡按李者有疑疾入某邑聞銳聲驚以邑令謀已欲挾死之廣平守爭之又以守亦謀已至遣吏發卒圍廣平捕守一城盡空公聞變星馳往撫定之上章露巡按罪狀而臺長庇其屬爲之訟寬公復上章力辯廷論竟直公而黜御史巡按於巡撫爲同事而臺長又於公僚長也公本通達不務爲崖異立礪礪名然利害大體所在不肯苟爲辨阿此蓋公所難者其以都御史出鎮淮淮當士大

夫南北衝地過者或不愜所望則益易爲謫然公自如也丐申 章聖梓宮南祔始奉 旨由江而諸議行大臣至儀真議從陸諸官心知不可而憚於以身任江行之險悒悒不敢出語公獨力爭之極言沿江山險路不可通狀且奉 玉體馳峻坂上下撼頓萬一 聖情聞之悲惻奈何議論往返數日而諸大臣亦密遣人探沿江路果險如公言乃決從江之議以錢絙維舟行如期至承天遂如期以葬沿江千里居人免於伐樹發屋役夫數萬人得無走死山谷中公於是有力焉及爲刑部尚書轉戶部益能於其官乙

已致仕歸武進歸年餘而病卒年七十有四公性喜
讀書雖裨官小史亦用以資其經略尤喜爲詩歌羽
檄倥傯中率不廢詩上谷榆陽稿皆成帙也善字書
有晉人風骨其罷宣府家居好獎進後輩與人言規
規不厭與士人言言書與俗人言言勸業莫不取
其有益是時余以諸生候公公過待以爲國器及入
仕途公每遺書誨以經世之學顧榜散無能自效於
公者公且死以傳文見屬余不得辭也公平生儉樸
旣已貴其自奉如居約時獨祀先款客則極豐潔曰
賓客重事也年五十遂獨居未嘗蓄媵妾教諸子受

而有法一飲食必有訓自公既沒 天子賜之葬祭
贈公太子太保謚曰襄敏嗚呼可謂有始有終者矣
妻夫人吳氏子二人仕爲都督府都事偉太學生皆
好禮讓能世公之家者也

戶部尚書徐公問

張 袞

公諱問字用中武進人弘治十五年進士除廣平推官名爲刑部主事歷車駕郎中出知登州以才劇調臨江二州之地瀕江海林莽菁深椎埋剽盜馮爲淵藪公以方略招撫擒獲亡慮數千增築臨江壞堤凡七十二處行者安之鹽運司易汚染人咸不樂官此公欣然受長蘆使之命曰吾將以薄躬清是官也歷長蘆藩能以身任一方利害蠙珠眞香號產於嶺南中使採獲不中巡按御史憂之將以責諸賈公爭曰錄有禁如是不趣賈爲盜耶惟令所產而獻某不敢

避罪竟蒙鑒宥是歲入覲吏部首以公才廉列上
與賜章服擢右副都撫貴州獨山土酋蒙鉞弑父以
叛公提師誓境上親執桴鼓一鼓而元兇就戮捷
聞有白金文綺之賜召貳兵部上安攘大計凡八
條一時債帥不敢鑽穴以入未幾以疾在告者十年
詔復起公南少宗伯二載進司徒方半載而公復
歸矣公自起家法曹斷獄具文不爲苟比懲權倖縱
橫雖甚威力臨之屹不爲動見上官論事侃侃不阿
所蒞之處輒先風俗講求禮樂學者見其言與行莫
不歎爲復見三代遺風

南京戶部尚書孫公應奎

南京戶部尚書孫應奎河南洛陽人正德辛巳進士
初授章丘縣知縣徵拜給事中嘉靖十五年以言事
忤旨兩繫詔獄旣得釋旋以大計論臺臣不法謫
高平縣丞稍遷兵部員外郎歷陞都察院右僉都御
史巡撫順天左副都御史協理院事戶部右侍郎提
督倉場本部尚書被論改南京工部尋改戶部引年
致仕隆慶四年九月卒賜祭葬如例

資政大夫南京戶部尚書書庵盧公紳墓誌銘

潘恩

公諱紳字汝佩書庵別號也陝西咸寧人祖興父旺以公貴俱贈通議大夫戶部左侍郎祖母李氏母周氏俱贈淑人公少而穎敏潛心問學博覽典墳爲邑弟子員選入正學書院纂修雍大記諸書多所撰述壬午舉於鄉明年舉進士授四川遂寧縣令公廉勤自勵治教大行邑人戴之宛若慈母邑瀕大河夔有涿水之患公築以魏堤植以密柳水害永消民受其利會蜀連年青災飛蝗滿野獨不入縣境衆咸咤嘆

爲六載之間折獄明允無橫罹刑辟者庶幾畫像之
風歲旱大雪素衣徒步禱於羣祠輒有甘澍之需維
此人胥頌之戊子 召入拜工部主事治水呂梁有
功癸巳往督杭州竹木廠立法寬平商民感德進拜
員外郎督造臨清等處輒料兼理衛河提舉司時
大工孔亟磚用數倍常額公經理維勤蠲省費百工
若商便之運不稽畱事有攸濟 上嘉悅泮錫銀幣
有差進拜郎中管理 九廟 慈寧兩宮勞績懋著
廟工成加俸一級 兩宮工成陞二級辛丑摧湖
廣按察司副使撫治荆南公加意牧寧鎮靜不擾豪

猾巨奸廉致於法一道肅然撫屬界連川貴西永施
瞿諸夷構兵連歲不解天子怒下守臣委公會兩
省勘議公首宣言於衆曰夷性犬羊先王以不治治
之若繩制太嚴恐生他虞不若開諭利害俾罷兵息
民足矣衆從之諸夷帖服癸卯少司空陸石涇公奉
命修理顯陵檄公總理工務有白金綵幣之錫甲
辰擢江西布政司叅政分守湖東瑞州寇起公單車
往諭解散其黨歲侵民饑賑恤有條全活者衆丁未
擢貴州按察使清平衛指揮某者暴虐貪婪激變軍
士連結諸苗爲亂公驅車入城執首惡以泄羣怒申

國典以示更生梗化之徒咸泣紀法肅然戊申捐出
西右布政使庚戌改山東左布政使 宗藩歲祿之
供邊關兵馬之餉諸務劾午公調停區畫咸麗厥宜
辛亥進擢順天府尹時有勲貴人權傾中外倚勢欲
奪畿內民田數百頃者關說京兆公力拒不顧人以
爲難壬子擢戶部右侍郎甲寅改左侍郎總督倉場
兼理西苑農事申明舊章釐革宿蠹清查積貯附餘
米十餘萬石以裕國儲然持法過嚴同事有銜之者
矣是歲三載考績蒙 恩錫誥命上及二代錄蔭洪
先爲太學生居太倉三年游承 特遣及銀幣鈔錠

羊酒之賜丙辰起拜南京戶部尚書定立章程約束
悉鑿鑿可行丁巳循例自陳致仕上賜允歸鑿他
畜魚栽花藝竹興至則與二三知友飲酒彈碁論文
話舊日以自適公儉樸沖澹爲人誠恪簡夷於世味
泊然絕無所好雖囊無餘資廩無餘粟而散財喜施
不責償報嘗謂人寧負我毋我負人寧我容人毋人
容我立朝正色直諒侃侃不阿一時善人君子交口
言之而沮之者亦力家居孝弟肫肫事父竹軒公先
意承志罔有所違伯仲二兄蚤世撫其遺孤授以恒
業教之誨之不啻已子關中人上稱之謂爲不可及

資善大夫南京戶部尚書鮑公道明墓誌銘

汪道昆

今上二年春正月己卯南京戶部尚書鮑道明卒於
家 上輟朝 諭祭葬如令甲有司舉葬事公字行
之歛嚴鎮人也鄉人故多公長者稱三峰先生云公
父封兵科右給事中諱榮芳母封孺人出汪氏公生
端靖自如不受狎侮稍長受博士春秋嘉靖甲午舉
第四人戊戌舉進士授行人三歲進戶科給事中再
歲進左給事中尋進刑科都給事中當是時信州袁
州爭政言者率揣摩希望各中其驩其或浮慕骨鯁

之名排擊紛起公獨正色中立或以言貴詰公公謝
曰主德聖明臣愚不足以奉明詔如使株連毛舉
徒自託於直言臣雖愚不欲以此傷大體會御史奏
延綏失事巡撫都御史以捷聞先帝命兵科右給
事中蒞視之尋奉 聖書往公徧歷塞上閱虜出入
諸部塞亡人畜多寡有差按軍府部署方略較諸將
程期論罪輕重殿首功虛實策賑濟防禦諸便宜議
上當人人無枉撓聞者謂千鈞一發飲羽虎狼無
間狸狌矣先是虜入上谷公上言匈奴日伺邊必求
再逞乃今易置宣大總制用翁萬達易置本兵用唐

龍萬達方撫關中不得代宜未卽至龍以終養去母
在宜未卽來假令稱兵其何以應倉卒按 祖宗法
宜大設總督軍儲侍郎一人貳總制京師設提督團
營尚書一人貳本兵分任事權相表裏無事則戮力
共濟有故則可攝而代之復之便當事者計非急持
兩端其後虜犯京師卒用公議公在近侍七年出入
惟謹卽有不測獨由由然應之袁州中信州 先帝
怒甚收信州及建議復河套者併逮言官杖之廷公
頓首曰臣固當笞謹待罪出而參知江西政事居頃
之罪囚王連遣子叩 闕上書誣執故都御史胡繼

宗誹謗故入大辟辭連刑科公以故刑科都給事中
當就對簿先帝怒甚人人自危公頓首曰臣因當
誅謹待罪及事釋卒未嘗以喜愠示人既畢親喪補
山東職如故大盜師尚詔起歸德趙山東公以部子
邱成勝張武備甚具賊遂卻尋受禽公以保禦功
賜金論賞進浙江按察使益當輻輳之衝鄉人往來
輒中趾相錯部中權豪多關說不避惠文公戒問者
毋入鄉人謁毋入關說者書卽權豪面謁欲有言曾
未得一開口旣又發臨安故給事中高時奸狀械送
京師無何進四川右布政使以採木論賞復賜金

無何轉雲南左布政使時多徵發民將不堪公愀然
曰滇卽小饒直蝸濡耳蝸不轉則活轉則中乾此誠
藩大夫事乃會計全力什五自給什三轉輸什二備
歲凶他不意令旣布滇人至今便之己未入 朝扈
筦庫羨餘弗納尋進應天府府尹己復進都察院右
副都御史巡撫貴州貴州夷部鎔居故患盜殿最捕
盜諸吏士視獲盜多寡爲差諸吏士或掩不辜求追
簿責公遇文致不辜者立釋之阿堂攫印搆兵楚蜀
騷動公謂有苗視印爲向背請降新印令反側子自
安毋勤遠略爲也容山酋韓甸竊發公徵兵遣將討

平之斬首二百有奇旬就縛 先帝賜金幣下兵部
論功人言歲終類奏功故事猶得任子今大捷宜視
昔有加不然則籍子弟置有功部中亦得延賞公謝
曰臣奉 天子威得罪人固諸將吏功臣何敢爲子
孫地已進大理寺卿尋進戶部左侍郎 賜金幣命
袁州得罪去變置諸大臣公進南京戶部尚書益一
歲三遷矣公乘兵變後主度支體國撫軍不遺餘力
尋以疾乞骸骨 先帝優許之 上卽位初廣厲言
路諸大臣往往中多口惟公保身名完卽公無所瑕
疵其決策蚤矣會兵部左侍郎棠樾鮑公致仕歸公

宗人也鄉人嚴事二鮑視漢司隸同乃若明哲保身
則退之矣歲朔疾風自西北起占者以爲咎徵月將
終兩公相繼卽世吁嗟異哉

南京戶部尚書曹公邦輔傳

曹邦輔字子忠定陶人第嘉靖壬辰進士歷知元城南和二縣治在廉平裁省與民休息擢雲南道監察御史巡視河東鹽政釐革爲多課溢常額出按陝西會虜入延綏殺鹵甚衆邊臣匿不以聞邦輔上疏奏逮大將以下七人咸論如法秦宗人有殺人獄數年不決一訊而服奏正憲典出爲河南副使大盜師尚詔流剽兩河奉詔補治一日寇至監司錯愕或走伏匿邦輔親率吏士提刀躍馬馳入賊壁衆皆買勇向賊一以當百賊懾而潰遂破走之再擢浙江按察

使值倭夷入寇特拜右僉都御史巡撫應天將兵禦
寇追奔逐北前後斬首虜六百餘級會趙文華視師
求賄不得反用他敗論劾謫戍朔州吳人感其功德
爲祠生祀之隆慶改元起爲左副都御史協理院事
遷兵部左右侍郎總督薊遼軍務擢南京都察院右
都御史遷南京戶部尚書考績詣闕以年滿七十
陳請致仕邦輔爲人忠孝耿直志在殉國不避夷險
登仕四十年苦節清操始終如一田產蕭然不異寒
士嘗欲以身死封疆爲朝廷掃清朝漠不究其施
世以爲恨卒賜祭葬如法今祀學宮

資政大夫南京戶部尚書贈太子少保西塘王

公好問墓誌銘

許國

萬曆壬午南京戶部尚書樂亭王公卒於家計聞
賜祭葬如令甲贈太子少保公諱好問字裕卿別號
西塘永平樂亭人也大父茂父臣世有隱德俱用公
貴贈尚書母史夫人公生而穎秀有異徵弱冠善屬
文慨然抱當世之志嘉靖丙午舉鄉試庚戌第進士
授太常寺博士時賂遺公行泊然有以自守久之乃
擢御史公以風節自持行都城搏擊無所避會元夕
一巨璫張燈邸第陳百戲都人士女聚觀有蹂躪死

者嗇嗇公勿以聞公竟按其事以聞貴豪攸手嘉隆
之際內庫開籍洗匿莫可稽宦豎浸漁無算公請清
之得隱漏軍罷三萬二千有奇又川事近習謀督閩
營兵公抗疏謂自古未有以閩人監軍者卽有之亦
衰世事唐宋勿論如本朝王振劉瑾足爲殷鑒言
甚切直中外莫不嚴憚公公再被命按秦晉務飭
吏治便民生不爲時俗嬖姁之態以希上意如隴
山白鹿芝草榆次天書皆却不以獻公論避之於秦
議典革者八於晉上便宜者十天子嘉納焉公在
職八年抗志論所言悉軍國大計如禪聖治止

行幸肅戎政隆 大典彰 主德一政體飭禮儀勵
新政慎恤典重 孝思陳時議勤 聖學諸疏多見
施行當是時王御史之名聞天下尋遷大理寺歷左
右少卿晉太僕卿公朴忠自許遇事敢爲所至興利
剔蠹期無負任使居頃之移南京太常卿已復召入
爲通政使進工部右侍郎仍攝納言改刑部戶部公
再疏乞身不許久之遷南京右都御史總臺事尋拜
尚戶部尚書入賀 萬壽再疏如初 溫旨勉畱公
不得已就職壬午以滿上計復申前情又三四疏乃
聽致仕歸歸踰月而卒距其生享年六十有六歲初

公之爲尚書也會南中米粟貴時當折給人心洶洶
公遽發倉粟而後以聞也軍民乃安有詔賑江
南饑公不待移文趨發賑曰奈何稽朝廷德意以
忍待哺之民間者咸心服公以爲有古大臣風公爲
人謙和鞠躬折節之若不勝至其斷大事決大疑中
有定見外無畱行自謂責育弗及也方暑年好古自
負比長畱心聖賢之學至老彌篤嘗謂道本平實安
事苟難學貴定志勿爲利動以故闇然自修務在躬
行不欲爲空談終身恬澹寡交游造次必以禮初舉
於鄉樂亭令以公貧餽粟百斛卻之行用鼓吹前導

又卻之其起太常也令遺金二百以爲行資公一無
所受雖漸躋崇膳食不兼味衣不重帛卒之日家無
餘貲財平居手不釋卷書無所不窺著作甚富成一
家言謝政後始稍稍出有春照軒集三十卷

焦太史編輯國朝獻徵錄卷之三十一終

資德大夫正治上卿南京戶部尚書贈太子少保對滄王公基行狀

鍾羽正

海內名家以瑯琊王氏爲最異時徙而賢且顯者衆矣其在吾郡城則司徒公尤表表者也公諱基字啓亨號對滄其先曰邦彥者自沂州徙居萊陽至文質復徙居於青文質生南玉南玉生士先是爲竹軒翁聚鄒氏生公竹軒翁學於西嶼董公爲郡庠名士實甚好竹居雖貧必植佳篠望之猗猗有淇澳間想入省試俛中屢矣久之病且沒時公十三歲耳天性至孝哀毀骨立執喪備禮如成人旣葬卽篤志自力學

讀書數行下爲文宏藻有奇氣下筆千言立就十五
入郡庠試輒首出嘉靖乙卯中鄉試尚未冠也乙丑
成進士除授戶部福建司主事奉 敕督理通州等
處馬房籽粒馬房事與中貴人連多阻撓難治公少
年初仕乃斤斤督理不避怨勞先期報完比前歲多
六十餘兩復 命差管太倉舊例漕糧入倉部官監
之驗有短少責笞一二僦夫賠補其餘擁人不暇問
而黠者至匿糠近地乘其隙易米去公曰嘻是欲爲
鳥目乎我能謹廩乃與漕官約米以伍人隨吾所驗
一分少一伍俱照數補之勾稽精密乾沒者不得逞

其計良法至今行焉已而給散折色衛官多盜減者
每軍至短二分以爲常公曰吾能清其入不能清出
耶復與衛官約領銀各封完吾且面給驗一封少則
餘封俱照數補之甚者叅治衛官懾懼無盜減者諸
軍歡頌以爲自來所未有也是歲改委東官廳戊辰
陞四川司員外奉 敕督理寧武糧儲出納有法軍
商訟之邊官好私士自奉士亦便於免操直郎署官
至三百人公量留守關者餘俱發歸營諸將官見此
亦多退其所占者兩臺聞而嘉之曰今人人如王公
執戟無失伍矣已已陞陝西司郎中奉 敕督理甘

肅糧儲甘肅無積餉每藩司解至郎中收入庫撫鎮
卽來領之出入之際或不能無盈縮郎中代受其咎
公適言兩臺更其制令藩司解銀必先以報報至軍
門卽差官來候領而相交受吾特爲之監卽有盈縮
事在解官吾無與也壬申陞大同知府大同重鎮中
丞御史監司戎帥同處一城軍民錯雜風俗羯悍虜
新貢約束未堅事機紛拏萬緒公從容應酬緩急中
獄詞訟隨至隨結吏不得關其手嘗有宗室大獄株
累者百餘人傳爰書至數萬言公晡而審逮昏而罷
展卽解憲司奏成手中人皆不測以爲神代宗食祿

者數千人祿恤不給則環府門而鬨名曰大會守臣
爲所辱解綬去者兩三人公爲督逋賦調貧乏委曲
調劑人得其心畢任無敢擾者任中修城築堡防秋
大閱有功蒙欽賞一十二次丁丑陞山西按察司副
使兵備河東庚辰陞布政司叅政治蒲州州並大河
一日河忽南溢且抵城聲如霆震城中皆驚號公曰
無恐守臣卽不德鄉三老何罪河伯顧不仁耶設祭
望水拜水遽止崩處見石堤橫亘蓋遠古以護城者
遂建議接而增之自城抵首陽之麓蜿蜒如游龍河
自是不爲患蒲故繁阜婚喪競侈靡富者踰制貧者

效尤稍簡朴共誚薄之恥不敢舉喪停十餘年婚配
失期者衆公嚴禁論之婚依古制喪稱家有無男長
不婚喪三月不葬者治之喪而婚侈靡者比伍長共
舉之隱者連坐於是停婚喪者並舉風俗大變至今
稱焉乙酉陞湖廣按察使兵備蘇松常鎮四郡者可
抵一大省而財賦幾半天下公移訊牒山積江倉督
學使者狎跡至將迎動經千里解報人卷接踵道中
公精力能治之事至立斷無大小無留庭者春秋汛
海與浙兵會顧用餘艤鱗艘儻直不貲公獨心計此
民航而耗官帑費矣有黃魚船者亦以此時下海樓

櫓火械與官舫同其人數習海事今第輕其稅編爲
行伍分將將之費省而用精遂爲定制公精詳沉毅
所擘畫動中機宜州邑長及諸武弁奉行約束皆傾
輸肝膽不敢矯飾卽少易慮事輒不集吏民以爲耳
目所未覩鳳洲荆石二王公皆稱頌見各文集中丁
亥陞浙江布政使其賦事比蘇松更煩而弊亦更多
更難理公益殫精綜核凡租稅經費絜爲章程擇無
害吏主其籍出入纖渺具有可覆無侵蠹者區畫兵
食剖決詞訟日不足繼以丙夜雲流刃解政聲大著
尋陞都察院右副都御史巡撫大同公旣素習大同

事恩信著於吏民吏民間公至則喜公益推恩撫輯
皆得其心時虜雖入貢每恣睢要格外賞心實叵測
公內修戰具外鳴大義責之火酋叛順公親提將師
擒斬三百級以平旣又明愛人犯公又遣兵擒斬二
百餘級虜隨帖服嗣是諸將帥有欲搃撲嬰功者公
峻詞拒之曰通侯可倖忍以枯骨易功乎以其故邊
人免兵刃垂素綬帶公之恩威並用故耳大帥某性
桀驁好嗾軍士爲飛語挾撫臣公素知之明與約曰
撫鎮一體也然各有職自今調發不當撫餉不周責
在撫臣約束不嚴行伍不肅責在將軍帥唯唯悚懼

軍遂不擾已丑爲貢市事竣奉 旨賞銀二十兩紵

絲二表裡庚寅再奉 旨賞銀二十兩紵絲二表裡

陞兵部右侍郎公久在兵間知邊疆事各邊籌兵請

餉樞臣輒以問公公屈指籌之動如燭照無不中窾

是歲考三品滿封祖父如其官廕子入監辛卯以閱

視有功陞俸一級 欽賜飛魚服一襲銀四十兩壬

辰以邊功再陞俸一級公自爲郎爲守以及藩臬開

府俱任邊塞馳驅二十餘年積勞成疾至是具疏請

告時 朝廷方鼎重公屢求不允苦詞力請乃獲

旨准回籍調理痊疴之日地方官具奏起用戊戌奉

首起南京刑部右侍郎至則署部事留部堂號廳
事刑曹獨治獄與北同又畿內郡縣訟訟多赴部陳
告公悉心裁決民以不冤異時熟審率故事而已公
原情麗法多所寬什會司馬缺則以公攝兵部司空
缺又以公攝之一人兼三尚書事往來各部請議兵
食練戈船修城郭郎官通進請事見人人殊公據憲
典酌時宜片言決之皆受命去不勞而事理更驚以
爲神甲辰陞南京戶部尚書總督糧儲兼都察院右
副都御史司農事公所素熟勾稽釐革秋毫詳盡收
充給散一如太倉時吏弊頓絕振明紀法不吐不茹

無何司馬缺再以公攝之公曰吾嘗憾治餉者苦兵治兵者苦餉夫卒多冒而饋不時弊也久矣今兼治之以兵實餉以餉稽兵尚安隱乎益自公在事而士無缺伍餉無冒支也乙巳當京察公例自陳兩承

溫旨不准辭公曰吾敷勵中外近四十年語云知止不殆四疏力請乃得予告歸時部院公費多贏餘者吏請取以治裝公怫然曰吾居官數十年無纖毫染今老矣忍以去易初心哉登舟行李蕭然圖書數篋而已途中遇山水名勝奇踪古蹟輒憑而弔焉抵舍與諸親友爲詩酒會不問家生產公遊宦雖久然清

介異常以故無甚貲產食貧樂善意適然也丁未八月忽感風痰諸郎奔走醫藥少間屬孫女適白氏者以節自經死痛怛遂劇竟不起公賦性沉肅寬厚居官詳審周密事求當不要風力名然持身廉正人不取干以私撫大同日代王餉美醢二毘使詞曰此醢耐幸公自飲公弗知令吏受之將以饗客使復來言曰曩酒非常酒也幸公自酌勿飲人公乃知非酒也嚴詞拒之卽爲返壁一僧素相識公在兵部僧投一函書白米四百石怪問之故乃爲衛官謀陞者公大怒叱之盲僧妄汗我不知故人耶裂其書遂去武進

士高某者官十年不調公憐其才爲語職方陞之某不自意感激甚令僉具百金致謝公曰吾憐某久因公言之爾以我爲私耶我將執訊汝其人竄去和而介如此公自幼孤事母至孝旣鮮兄弟獨一姊嫁黃氏姊亡厚恤其家族人有缺乏者公至自鬻田助其婚喪諸生李姓者賣屋數楹見其貧復折券與焉公家業極薄自奉極淡而周給乎人其慈仁蓋天性也公生於嘉靖十七年十一月二十三日丑時卒於萬曆三十五年十一月十三日亥時享壽七十歲越明年撫臺黃公克纘蕭公焯會題請祭葬贈諡奉

青輿祭二壇造墳安葬 欽差尚寶司正卿張公久
徵來營葬事 贈公太子少保公邊功茂著清節絕
人 廷議應謚擇吉於萬曆三十八年十月二十五
日葬於雲門之麓公之三子皆從羽正遊以羽正少
知公宜爲之狀正惟自昔論人物者先平澹而後聰
明如公溫懿沉靜不以詭激譏氣取名非所謂平澹
者耶世稱最難理者兵食而公始終其間隨所至著
勲業可不謂明達經國厚重臣哉其孝友清操尤表
表人不可及正謗陋不能揚公盛美識其大畧如此
惟大方采覽焉